

Evangelio según Marcos

Jesucristo roy pjlú ère, e jyã tara Marcosdë

Kjibokwo ère sorë

Domer shäng kjlara ko Marcos. E kowëba Juan Marcos bakoe. E Jesús oppinggaga doglo sak kjwara kjingsho pjök (12) li kjlarayo llëme. Gueniyo woyotjlikoba ga e lan Pedro tjok enido, ga kjimtara Pedrorë kjibokwo ère të. Woyotjlikoba kjrina obi ga Jesús sök kjok ère kjing go obishko ga Marcos sök Jerusalén kjokyo, ga llëbo shäryara, lara Jesúsde li ñna, kura om go.

Jesús wolono, ga woshrara Sbörë iröng obi irgo ga ba tjlökwö kragaga judío llëm wleniyo löng Roma kjokyo li shdunaba ara, mär löng Jesús go kjishko. E kjishko ga kong kjibokwo ère tara Marcosdë, Jesús roy pjlú li miyde lok pjlú wlo, ega mär ber löng Jesús go jlökoyo wlo.

Jesús öör kjok ère kjing go, ga llëbo ÿdëba llëm wleniyo shäryara ara nopga ara boksho sorë li tara ba kong. E shdunaba ara, ga wolono pjang kjlös go sorë li tara ba kong. Gueniyo wolono irgo ga e woshrara Sbörë iröng obi sorë li tara ba kong bakoe. Woyde ga miyde lok kjibokwo ère go ga Jesús dbo ara, bi moskwö Ä li kjinmo, ga eerishko ga shji kjimte ara.

¹ Jesucristo, e Sbö Wa. E roy pjlú li soyožlong eni.

Juan No Waga shäng kjok dogro no llëmshko

² Kjibokwo tara Sbö tjlökwö laga tek dënashko so Isaíasdë. Tjlëno beno eni:

«Sbö tjlëno ba Wa kong ga
 “No ichër kjlara bop bäm go,
 bop roy laga,
 irbo poshäryë bop kong wlo” le.

³ Kjøk dogro no llëmshko ga ëbo tjlë shäng dbo go ga
 “Irbo poshäryozĩ Tjlapga tjwe li kong.
 Shäryozĩ ber beke”* le.»

⁴⁻⁶ Eni ga no weno shäng kjlara ko Juan. E doyono shäng shwong sek öng jëkklo sok kësbandg zok go, dop pjriklo shäryak öng kwota go bakoe. Dli ba kong ue wlo li, e sekwa, or kjloshko so dyo bakoe. E öötong shäng kjøk dogro no llëmshko ga shäng oba wë jer di roshko ga tjlë oba kong ga «Llëbo owa shäryëmi löng li, e owa jlõe lozĩ, ga rayozĩ, ga pjäy wër jer di roshko. Shäryoromi eni ga owa pjang bomi go li löya Sbörë ber drete» le.

Judea soppa, Jerusalén soppa, e shrono löng träk llëm ba kuk. Eshko ga kjone kjone, llëbo owa shäryara li le oba uunkong boksho. E irgo ga we Juandë jer Jordán diyo roshko.

⁷ Ga Juan tjlë oba kong ga «No tjwe bor irgo kjlara. Bek wlo ga tja ba drepkwota dök wlo llëm, e tjwlo ara bor kjinmo anmoyö kjishko.† ⁸ Pjäy wër shäng di goshko, gueniyo domer tjwe bor irgo lira, pjäy go Sbö Sëya iche tjwe ber kësbandg bomi tjok» le.

Jesús wara Juandë

* **1:3** Isaías 40.3. † **1:7** Drepkwota döga lanyo, e tak pjang Mateo 3.11 go.

⁹ Eshkoshko ga Jesús opshino jek Nazaret kjokyo dwayo, e Galilea kjokyo obi, ga öötong shäng Jordán diyo, Juan shängshko. Eshko ga wara Juandë jer Jordán diyo roshko. ¹⁰ Wara pjir ga Jesús opshik tēm shäng di roy dwayoshko ga ãya ga kjok dogo roshwino beno oojong erä, ga Sbö Sëya to ter kjok dogo dwayo so dunggwo kjoyo, ga opyono sök ba go. ¹¹ Eshko ga ybö kuraba kjok dogo dwayo, tjlë ga «Bor wa li pja. Pja woydër ara. Tja wopjlú bop tjok» le.

Jesús tjlña Äre, llëbo owa shäryë wlo lara

¹² E irgo ga Jesús söra Sbö Sëyarë jek öötong shäng kjok dogro no llëmshko, ¹³ äya kjloshko so tjeng ara lishko, ga beno shäng eshko dbargwo sak pkëng (40). Eshko ga tjlña Äre ara, llëbo owa shäryë wlo lara. Ga Sbö parkagaga kjok dogo so shrono tjeng ba tjok kjlobö ba kjimtë.

Jesús ba pak soyono

¹⁴ Juan bängzaraba shäng no shdüzlong uyo roshko irgo ga Jesús jek öötong shäng Galilea kjokyo. Eshko ga Sbö tjlökwo roy pjlu le shäng oba kong, ¹⁵ tjlë ga «Dbar iara Sbörë li öötonge. Sbö ber no pjluwo wlo li, e dbaryo döröe. E kjishko ga llëbo owa shäryëmilöng li, e owa jlöe lozï, ga rayozïa. Sbö tjlökwo roy pjlu lër shäng bomi kong li, e kjrozïa» le.

Jesús, domerga mã shaga kjrara doglo pkëng (4)

¹⁶ Domer shäng kjlara ko Simón. Kjlara obi ko Andrés, e Simón lëng. Epga mã shaga. Pjlara ga löng ba kjla mã shakklo dbuk Galilea di bäng buk kësbang, shkung, so dlung kjoyo li roshko. Eshko ga Jesús jek jek shäng diksor go, ga ãya ga domerga

li bē lōnge. ¹⁷ Eshko ga tjlē ba kong ga «Pjāy tek bor tjok, pjāy pin wlo. Pjāy to lōng mā shak ame. Pjāy iēr to ber lōng no tōng bor kong shara» le. ¹⁸ Kuya lok ga ba kjla rayara jekdo, ga to jek ba tjok.

¹⁹ Jek kēgo sit ga domerga lōng do pjök ko Santiago, Juan. E data Zebedeo. Epga lōng ba kjla mā shakklo bāngyē kjong roshko ba data tjok. Ga Jesús jek shāng eshko ga domerga do pjök li ina, ²⁰ ga rokara jek ba tjok, opping ba tjok wlo. Kuya lok ga ba data rayara jekdo, beno sök ba kjong roshko ba parkagaga tjok, ga to jek lok Jesús tjok.

Ä sēya pjang domer goshko ichara Jesúsdē kjlara toe

²¹ E irgo ga to lok öötong lōng Capernaúm kjokyo. Öötong woshtozlong dbaryoshko ga Jesús opzrēno jek judíoga syō uyo jong eshko li roshko, ga nopga pina. ²² Tjlökwo lara jlökoyo, dbo ara go, le no pinggaga kjok ilgwekklo tara Moisésdē go lirē dik llēme. E kjīshko ga nopga lōng ba kuga li beno lōng yēy le erä.

²³ Eshko ga domer shāng kjlara, goshko Ä sēya kjlara. Ga Jesús ĩya sēya lirē ga öö le ba kong dbo goshko, tjlē ga ²⁴ «Jesús, Nazaret so, ¿pja tek shāng borwa barwē ega? ¿Pja tek shāng borwa pjigare? Pja ē miydēr pjluē. Pja iak beno shāng dboy Sbō kong» le.

²⁵ Kuya ga sēya li wlona, tjlē ba kong ga «Pja kjinkozong. Pja opkjōs domer kjwe go dwayo» le. ²⁶ Kuya ga domer li iara jek klan kjlulu erä. Eshko ga öö le sēya lirē dbo goshko, ga opkjono to domer li go dwayo.

27 Īya nopga tjeng eshko lirë ga beno löng yëy le erä, ga tjlë ëng kong ga «¿Kjwe llëro? ¿Tjlökwo tjaglën wleniyo bi kongdo llëm? Tjlökwo kjwe dbo ara. Ä sëyaga iche ga kole bakoe» le. 28 Eshko jek lëkong ga Jesús roy shdöktong jekdo Galilea kjokyo kjok kjwang jïkong.

Simón ëm poptara Jesúsdë

29 E irgo ga Jesús opshino judíoga syõ uyo li roshko dwayo Santiago, Juan tjok, ga jek öötong löng Simón, Andrés ushko. 30 Eshko ga Simón ëm buk ba bukklo kjing go, kjlirkono buk träk llëme. Roylara Jesús kongshko ga 31 jek öötong shäng swlo buk lishko. Eshko ga orkwo shara, kojona, ga kjlik li zenoe. Eni ga walë li dli shäryono ba kong.

Swlopga poptara Jesúsdë ara

32 Jek kjok ro zar ga swlopga, nopga goshko Ä sëyaga, e söraba ara Jesús kong.† 33 Kjok eshko sopga uunkong töno shrono lok u bäng li bokshto. 34 Nopga swlo llë ara poptara Jesúsdë, Ä sëyaga tjeng oba goshko li ichara to bakoe. Jesús, e ë miyde Ä sëyaga tjeng oba goshko lirë owa llëme. E kjïshko ga ichara Jesúsdë tjlë llëme.

Jesús, Sbõ tjlökwo roy pjlú le judíoga syõ uyo oblë oblë roshko

35 Wëshko kjok shröngto ga Jesús kojono, opshino jek kjok eshko dwayo, to jongya ëye llëmshko, syõshtë Sbõ kong wlo. 36 E irgo ga Simón to shäng ba pjeyoga oppingga tjok ba wlëk. 37 Wlëdashko ga

† 1:32 Eshko ga e woshtozlong dbaryo. Ga e dbaryo ga epga jëk pjola llëm kjïshko ga swlopga söraba Jesús shwoy kjok ro zar kjwlëshko.

tjlě lok ba kong ga «Oba uunkong to löng bop wlěk» le.

³⁸ Kuya ga tjlě ba kong ga «Shji to jongya kjok shto oblě oblě, Sbö tjlökwo roy lër eshko wlo, miyděba wlo. Tja shrono shäng e kong wlo» le.

³⁹ Eni ga to shäng Sbö tjlökwo roy pjlú lě Galilea kjokyo kjrina kjrinishko, judióga syõ uyo lok kj-wobi li roshko. Ga Ä sěyaga tjeng oba goshko li iche to bakoe.

Domer poglo go swlo ara, sho an do jikong wleniyo poptara Jesúsde kjlara

⁴⁰ Pjlara ga domer shrono shäng kjlara Jesús shwoy. Domer li poglo go swlo ara, sho an do jikong. Öötong shäng Jesús zlong bäng ga kjök tono ba bokshto, tjlě ba kong ga «Tja poptěp woydě ga tja poptěp ga pjlúe» le.

⁴¹ İya ga songe le, ga porwara ba orkwo go, ga tjlě ba kong ga «Pja poptěr woydě. Pja ber pjlú shara» le. ⁴² Jekdo eshko ga domer li poptonoe.

⁴³⁻⁴⁴ Eshko ga Jesús tjlě ba kong ga «Tja kuzong. Pja poptoror lěp ẽ kong llěme. Pja nom opping syõshtaga Sbö kong nopga kjışhko li kong, pja İya wlo eröe. Sbö sěngglo lara Moisésde, pja äär Sbö poshrěk ba ushko ga pjlú wlo li söp, twěp ba kong, pja poptono miyděba wlo» le, ga ichara toe.

⁴⁵ Gueniyo ga domer poptono li to shäng kjone pogoshko ga tjlě ga «Tja poptara Jesúsde» le ẽ kong pogo. E kjışhko ga Jesús jek opzrěk u ara tjeng lishko ga äe. To jek wleni ga oba tön ba shwoy ara anmoyõ kjışhko. Eni ga beno shäng no llēmshko. Eni ẽmdě ga İkoba äär träk llěme.

2

Domer dre kuga llëm wleniyo poptara Jesúsde kjlara

¹ Dbar kjwöbö irgo ga Jesús shrono sök Capernaúm kjokyo iröng obi ba ushko. Miydaraba ga shrono sök iröng ga ² oba shrono löng träk llëm ba shwoy, ga u li dino tjung no eröe. Oba ara ba u bongkjako bakoe. Eye äär u bäng zlong ga äe.

Jesús sök Sbö tjlökwö roy lë oba kong kjër roshkoshko ga ³ domerga tjwe löng doglo pkëng (4), swlo söno kjlara. Swlo li buk töshko, dre kuga llëm wleniyo. ⁴ Eshko ga söra lok shrono u bongkjako ga söya kjër roshko, Jesús sökshko lara, gueniyo to öötong ey llëm, oba ara kjÿ. Eni kuzong ga jem tyono lok u dbo kjing sdok li kjing go, kjing döra sira, swlo li lona ter pjang ba poglo roshko öötong buk dew, Jesús sök lishko.

⁵ İya Jesúsde ga swlo sögaga li mär ba go ga tjlä swlo buk töshko li kong ga «Domer, owa pjang bop go li lönor beno drete» le.

⁶ No pinggaga kjok llgwekklo tara Moisésde li go löng eshko kjlöbö. Wotjlík lok ga ⁷ «¿Kjwe ëro? jDomer kjwe shäng Sbö läywë owa, ber tjwlo llëm wlo le! Owa löngga nopga kong li Sbö eröe» le.

⁸ Wotjlík löng llë li miydara Jesúsde pjir kuzong ga tjlä ba kong ga «¿Pjäy wotjlík owa eni ega? ⁹ «Owa pjang bop go li lönor beno drete» loror ba kong. Gueniyo lönorde, de lönor llëm, e İgömi llëme. Gueniyo ga «Pja kojözung. Bop bukklo kjwe kjrozung. Pja jëkzung» loror ba kong ga poptororde, de poptoror llëm, era İgömi wëlle. ¹⁰ Kjok ëre kjing go ga no to ter kjok dogo dwayo ëre dbo ara,

owa pjang nopga go li lön ber dret wlo ga pjlúe. Miydëmi wlo ga llëbo shäryër e» le. Eni ga tjlë swlo buk töshko li kong ga ¹¹ «Lër bop kong ga pja kojözong. Bop bukklo kjwe kjros, ga pja nom bop ushko» le. ¹² Kuya ga kojono, ba bukklo kjrara, ga to jek ba ushko.

Ïya löng eshko lirë ga beno löng yëy le erä, ga Sbö poshrëra, ga tjlë lok ëng kong ga «Llonoshko ga llëbo ïydë kjweni llëme» le.

Leví rokara Jesúsde

¹³ E irgo ga Jesús jek öötong shäng di bäng buk kësbang li kjako obi. E irgo ga nopga öötong löng ara ba zlong, ga epga pïya Jesúsde shäng. ¹⁴ Jek jëk shängshko ga domer sök kjlara eshko ko Leví, e dbur tönnga Roma so kong. E Alfeo wa. E sök ba pak lishko. Ïya Jesúsde ga tjlë ba kong ga «Pja tek bor tjok, pja pin wlo» le. Kuya ga kojono, ga to jek ba tjok.

¹⁵ E irgo ga Jesús jek öötong sök ië Leví ushko,* ba oppinggaga tjok. Ga nopga dbur tönnga Roma so kong öötong löng ië ba tjok eshko, nopga owa wleniyo oblë öötong löng ië ba tjok eshko bakoe. Nopga eniyo jëk löng Jesús tjok ara.

¹⁶ Eshko ga nopga löng kjlëbö no pinggaga kjok llgwekklo tara Moisésde li go, epga fariseoga bakoe. Ïya lok ga Jesús sök ië nopga eniyo tjok ga tjlë ba oppinggaga löng li kong ga «¿Bomi pingga kjwe ië nopga owa wleniyo tjok kjweni ega?» le.

* **2:15** Grecia so tjlökwo ëre llë loklo miydëy yötso llëme. E Jesús jek öötong sök ië Leví ushko loklo, llëm ga Jesús jek öötong sök ië Jesús ushko loklo. Ë ushko miydëy yötso llëme.

17 Kuya Jesúsde ga tjlë ba kong lok ga «Nopga löng pjlú, swlo llëm ga e dwlomnega woydë llëme. Swlopgara dwlomnega woydë. Eni ga tja shrono shäng kjok ëreshko, nopga pjlo bek li rokaga llëm, nopga owa li rokaga eröe» le.

Jesús lano shji ië llëm kjïshko

18 Olö ga Juan oppinggaga, fariseoga, e ië llëm Sbö kong. Pjlara ga löng ië llëm enishko ga nopga tek shrono löng Jesús shwoy ga tjlë ba kong ga «Juan oppinggaga ië llëm Sbö kong dbar kop ara. Fariseo oppinggaga omshäryë eni bakoe. ¿Bop oppinggagara omshäryë eni llëm ega?»

19 «Orkwosmozlong dbaryoshko ga domer orkwosmok wlo li† shäng ba tjok obishko ga nopga mak löng eshko li† ië llëm ga äe. 20 Gueniyo domer li söra ba shjiryoshko ga epga ië llëm eshko jä.

21 »Shwong këguë§ bängyëy shwong likyo tja glën* go llëme. Shäryoroy eni kjwe ga shwong likyo tja glën li, shwong këguë li, e sreya, dwler jek këgong.

22 »Kjillgwo bo dyo dbo ara tja glën† tyëy ba bapkwö këguë shäryak öng kwota go† roshko llëme. Shäryoroy eni kjwe ga ba bapkwö li böptur. Eni ga

† 2:19 Domer orkwosmok wlo le li, e Jesús loklo. † 2:19 Nopga mak löng eshko le li, e Jesús oppinggaga loklo. § 2:21 Shwong këguë le li, e tjlökwo twara Sbörë Israel tjëyoga kong jlökoyo dënashko li loklo. * 2:21 Shwong likyo tja glën le li, e tjlökwo twara Sbörë jlökoyo tja glën Jesús kjïshko li loklo. † 2:22 Kjillgwo bo dyo dbo ara tja glën le li, e tjlökwo twara Sbörë jlökoyo tja glën Jesús kjïshko li loklo. † 2:22 Kjillgwo bo dyo dbo ara bapkwö këguë shäryak öng kwota go le li, e tjlökwo twara Sbörë Israel tjëyoga kong jlökoyo dënashko li loklo.

kjillgwo bo dyo li, e ber llëno ame, ba bapkwō li ber eni bakoe. Eni kuzong ga kjillgwo bo dyo dbo ara tjaġlën tyëy wlo ga woyde bapkwō tjaġlën» le ba kong.

Woshtozlong dbaryo ga Jesús oppinggaga dwla bo kjrono

²³Woshtozlong dbaryo kjwara ga Jesús jëk shäng dwla dgak buk li tjrëko ba oppinggaga tjok. Eshko ga ba oppinggaga löng dwla bo kjrë, ue lok wlo.

²⁴Ïya fariseogarë ga tjlë Jesús kong ga «¡Bop oppinggaga kjwe ïzong! ¿Löng llëbo shäryako woshtozlong dbaryoshko llëm li shäryë ega?»

²⁵«¿Dënashko ga David, ba yorkagaga pjli lok arashko ga llëye shäryara tak pjang Sbö tjlökwo go li, e lomirë llëmdo? ²⁶Abiatar sök syöshtaga Sbö kong ba pjeyoga kjishko kësbangyo dbaryoshko ga David opzrëno jek shäng Sbö u roshko, ga pjlung shosho suk pjir iak beno tjeng dboy Sbö kong li uara, ga twara ba nopga jëk löng ba tjok li kong, ue wlo bako, e uaga syöshtagarë erö gueniyo» le ba kong.

²⁷E irgo ga tjlë ba kong obi ga «Woshtozlong dbaryo, e shäryak beno nopga kjimtoklo. Nopga, e shäryak beno woshtozlong dbaryo kjimtoklo llëme.

²⁸E kjishko ga woshtozlong dbaryo kägäyo li, no to ter kjok dogo dwayo ëre li e» le.

3

Woshtozlong dbaryo ga swlo poptara Jesúsde kjlara

¹⁻²Woshtozlong dbaryo oblë ga Jesús opzrëno jek judíoga syö uyo jong kjok eshko li roshko.

Domer shäng kjlara eshko orkwo kjwara slosloe. Fariseoga löng eshko bako, Jesús dë, swlo li popte woshtozlong dbaryore ñya lok wlo, rote e go wlo.

³ Eshko ga Jesús tjlē swlo li kong ga «Pja kojōs shäng nopga löng kēs ère tjrēko» le. ⁴ E irgo ga Jesús tjlē fariseoga li kong ga «¿Woshtozlong dbaryo ga llēye shäryëy oblē kong ga pjlú? ¿Llēbo pjlúre, de llēbo owa? ¿Ère dbaryo ga kjlara buk ba llēmdo shinmotkē wlo ga llēye shäryëy? ¿Wëyëre, de kjimtëy?» le. Kuya lok ga beno tjeng kjing erä. Dboryara lok llēme.

⁵ Eshko ga löng ba zlong bäng pjribri li ñna, ga iirkorgö ba kong, swlo li songe le lok llēm kjīshko. Ga tjlē swlo li kong ga «Pja orkwo roshwīzong» le. Kuya ga orkwo roshwino, ga poptono beno pjlúe.

⁶ Gueniyo ga fariseoga opshino jek lok ey dwayo, ga öötong ëng tōno lok Herodes pjloyoga tjok. Eshko ga tjlē lok ëng kong ga «¿Jesús, e zröy sorë ga pjlú?» le.

Swlopga poptara Jesúsde ara

⁷⁻⁸ Dbar kjwara ga Jesús opkjono jer öötong shäng ba oppinggaga tjok di bäng buk kësbang li kjako. Nopga to jek ara ba tjok. Jesús roy öötong kjok shto oblē oblē, ga nopga shrono löng ara ba ñk, Galilea sopga, Judea sopga, Jerusalén sopga, Idumea sopga, kjok buk Jordán diyo kjwo kalëkong sopga, Tiro sopga, Sidón sopga bakoe. ⁹⁻¹⁰ Jesús shäng nopga poptë ara, e miydaraba kuzong ga swlopga shrono lok ara ba zlong bäng, porwe lok wlo. E kjīshko ga ba oppinggaga ichara kyyong wlëk kjlara, nopga tjwe arashko ga jem tyë kyyong li roy wlo, llíkoba llēm wlo.

¹¹ Eshko ga nopga goshko Ä sëyaga tjeng kjlöbö. Jesús ñya lokshko ga tjwe löng ba zlong bäng, ga kjök torgö, öö le lok, tjlä ba kong ga «¡Pja Sbö Wa!» le.

¹² Kuya ga tjlä ba kong ga «Tja ë lëmi ë kong llëme. ¿Kuromire?» le.

Jesús domerga kjrono doglo sak kjwara kjingsho pjök (12)

¹³ E irgo ga Jesús to jem dlup jong kjwara eshko bigdo go. Eshko ga nopga rokara tek ba zlong bäng kjlöbö, ¹⁴ ga kjrara doglo sak kjwara kjingsho pjök (12), ber löng Sbö tjlökwö roy laga ba äska wlo, ber tjeng jëk ba tjok wlo, iche Sbö tjlökwö roy pjlu shdök kjok shto oblë oblë wlo, ¹⁵ Ä sëyaga tjeng oba goshko li iche dbo twara ba kong li go wlo bakoe.

¹⁶ Domerga kjrara doglo sak kjwara kjingsho pjök (12) li ko lok eni:

Simón, e koiara beno Pedro;

¹⁷ Santiago, e Zebedeo wa;

Juan, e Santiago kjlarayo, pjöyikong li kowaraba

Boanerges (e epga so kjrik kjoyo loklo);*

¹⁸ Andrés;

Felipe;

Bartolomé;

Mateo;

Tomás;

Santiago, e Alfeo wa;

Tadeo;

Simón, e zelote;

¹⁹ Judas Iscariote, e Jesús soynega.

* **3:17** Grecia so tjlökwö ëre llë loklo miydëy yötso llëme. Gueniyo kjone kjone tjlä ga epga so kjrik kjoyo loklo le li, e domerga iir ä wleniyo loklo.

Jesús, Beelzebú†

²⁰ E irgo ga Jesús jer dlup li dwayo, ga opzrëno jek u roshko. Jesús ïkoba shrono löng ara kuzong ga Jesús, ba oppinggaga, e kong dbar ië lok wlo ëmdë ga drete. ²¹ Eni ga llëye shärye shäng li roy kuya ba pjeyoga epenga lirë ga woyotjlíya lok ga «E skwërkono dikjoyoe» le. E kjïshko ga tjlë lok ëng kong ga «Shji to wlokjrë» le.

²² No pinggaga kjok llgwekklo tara Moisésdë li go tek shrono löng Jerusalén kjokyo dwayo kjlëbö, ga tjlë lok ga «¿Domer kjwe goshko Beelzebú! Ä sëyaga iche to, dbo twara Ä sëya kägäyo ko Beelzebúrë ba kong li go» le.

²³ Eni ga nopga löng li rokara Jesúsdë tek ba zlong bäng, ga tjlëno ba kong llëbo jyäglo go. Tjlë ga «¿Ä, e iche Ärë opshik om go sorëro? ²⁴ Pjlu llë, ba nopga ëngkjwë ëng tjok kar kar wleni ga e oppjik lok om go. ²⁵ Nopga tjeng u kjwaraso, e ëngkjwë ëng tjok kar kar wleni ga e oppjik lok om go bakoe. ²⁶ ¿Eni ga Ä, e ëngkjwë ba sëyaga tjok wleni ga e pjir maling llëmdo?

²⁷ »Domer sök kjlara dbo ara ba ushko wleni ga no jek äär opzrëk lürkë ba u roshko ga äe. Woyde ga domer li shara, pjirira bäm go guing. Enira ba llëbo lüyotke ga pjluë.‡

²⁸ »Lër bomi kong jlökoyo ga ëye llëbo owa shäryë, tjlökwo lë owa ga owa li löya Sbörë ber dret ga

† 3:19 Ä, e kowëba Beelzebú bakoe. ‡ 3:27 Domer dbo ara le li, e Ä loklo. Lürkaga le li, e Jesús loklo. Lara eni li, e Ä sëyaga iche wlo ga woydara ga Ä zana guing loklo.

pjlúe. ²⁹ Gueniyo eye Sbö Sëya läywë owa ga owa li löya llëme. To beno pjang ba go ÿyadoe» le.

³⁰ Tjlëno eni, lunashko ga no pinggaga kjok llgwekklo tara Moisésdë li go tjläno lok ga «Domer kjwe goshko Ä sëya kjlara» lara eni kjïshko.

Jesús, ba mekë, ba lëmga

³¹ Eshko ga Jesús mekë, ba lëmga, e shrono tjeng kjoko, ga no ichara lok kjlara ba rokë. ³² Eni ga nopga sirkeno tjeng Jesús zlong bäng li tjlä ba kong ga «Bop mekë, bop lëmga, e shrono tjeng bop wlëk kjoko» le.

³³ Kuya ga tjlä ba kong ga «¿Bor mekë, e ë? ¿Bor lëmga, e ë?» le. ³⁴ Eni ga ba oppinggaga sirkeno tjeng ba tjok li ÿya ga tjlä ga «Bor mekë lër li kjwepga. Bor lëmga lër li kjwepga. ³⁵ Eye Sbö kolë ga era bor mekë wleni, bor lëng wleni, bor dor wleni» le.

4

Dwla sguingga

¹ Jesús öötong sirkeno sök di bäng buk kësbang li sor go ga nopga pina eshko jek obi. Nopga shrono löng ara kjïshko ga Jesús opyono kjong roshko, ga sirkeno sök eshko. Nopga li beno tjeng di bäng li kjako. ² Eshko ga epga pina ara llëbo jyäglo go. Tjlë ga ³ «Tja kuzïa. Domer shäng kjlara dwla sguingga. Pjlara ga opshino to jek dwla sguing. ⁴ Sguïyashko ga kjone kjone lono tjeng irbo bäng, ga sënwa shrono, ga uara lok drete. ⁵ Kjone kjone lono tjeng ak ara tjrëko, klung sho ara llëmshko, ga weno maling, klung sho rong llëm kjïshko. ⁶ Gueniyo slenggwo dret kjïshko ga dlo wenoshko ga sura,

beno dogroe. ⁷ Dwla kjrina obi, e lono tjeng shkō sho roshko, ga shkō sho li kunoshko ga dwla li llgwĩna beno bo llēme. ⁸ Dwla kjrina obi, e lono tjeng klung sho pjlú kjing go, ga kuno, botjyono pjlúe. Kjoneshko ga sok kjwara botjyono kjwo sak mya (30), kjoneshko ga botjyono kjwo sak tjer (60), kjoneshko ga botjyono kjwo sak dbäw (100)» le.

⁹ E irgo ga tjlē ba kong jek sira obi ga «Eye kwomgwo tjok ga woyde ga kuya yōtso» le.

Jesús tjlēno llēbo jyāglo go erä ega

¹⁰ Nopga tjeng kēs li briktong irgo ga Jesús oppinggaga doglo sak kjwara kjingsho pjök (12) li, oba oblē jek löng ba tjok wleniyo, e tjlē lok ba kong ga «Rokērwa bop kong sira ga llēye lorop llēbo jyāglo go yē, e llē loklo pjlo llgwes borwa kong, miydērwa wlo» le.

¹¹ Kuya ga tjlē ba kong ga «Sbö ber no pjluyo sorē li roy miydaydēba llēm li pinaba bomi kong. Gueniyo nopga oblē kongda, lēr llēbo jyāglo go erä.

¹² Eni ga

»«Īya löng kjēr ga llē ĩyde miyde lok llēm,
kuya löng kjēr ga llē loklo miyde lok llēm
bakoe.

Eni llēm kjwe ga

optwē ber Sbō kong,

ga owa pjang ba go li löya ber drete»» le.

Dwla sguingga lanyo, e llē loklo lara Jesúsde

¹³ E irgo ga Jesús tjlē ba kong ga «¿Tjlokwo lēr shäng llēbo jyāglo go ère llē loklo miydēmi llēmde? Miydēmi llēm ga tjlokwo lēr llēbo jyāglo go obi ga miydēmi llēm bakoe. ¹⁴ Dwla sguingga li, e Sbō

tjlōkwo laga oba kong li loklo. ¹⁵ Kjone kjone, e so dwla lono tjeng irbo bängli kjoyoe. Tjlōkwo li kuya, gueniyo Ä tjwe eshko, ga döya ba shjiryo.

¹⁶ »Kjone kjone, e so dwla lono ak ara tjrēko li kjoyoe. Tjlōkwo li kuya ga kjre lok wopjlúe.

¹⁷ Gueniyo tjlōkwo li äär ber ba pjlúshko jlōkoyo llēm kjīshko ga llēye wen ba kong sirashko, epga shdungoba tjlōkwo li kjīshkoshko ga raye, söya ame.

¹⁸ »Kjone kjone, e so dwla lono shkō sho roshko li kjoyoe. Tjlōkwo li kura, ¹⁹ gueniyo llēbo tjeng kjok ère kjing goshko li woyotjlīya ara, wo pjang dbur go, llēbo tjeng kēs li kjre woydē ber ba kong wlo bakoe. E kjīshko ga tjlōkwo li woyo ba kong ame, ga bo wen tjlōkwo li kjīshko llēme.

²⁰ »Gueniyo ga kjone kjone obi, e so dwla lono tjeng klung sho pjlú kjing go li kjoyoe. Tjlōkwo li kuya, ga kjre jlōkoyo. E ber shäng so dwla botjyono pjlú kjoyoe. Kjoneshko ga sok kjwara botjyono kjwo sak mya (30), kjwo sak tjer (60), kjwo sak dbäw (100)» le.

Iök shjiy

²¹ E irgo ga Jesús tjlē ba kong ga «Iök borkey jong shjiy, jney llēbo dorko wlo llēme. Iëy jong kjókshko dey. ²² Llēbo jnek tjeng li, e woyde Sbörē ga ber ikoba wēlë wlo. Ga llono ga e ber miydēba dret, iök shjiy poyong jong kjókshko wleni. ²³ Eye kwomgwo tjok ga woyde ga kuya yōtso.

²⁴ »Ga llēye kumi löng li kuzī yōtso. Kumi yōtso wleni ga pjāy opping ara. Kumi yōtso llēm wleni ga pjāy opping ara llēme. Kumi sorē ga pjāy opping eni, ga pjāy opping e kjinmo obi. ²⁵ Eye llēbo tjok ga

sëya jek obi. Ëye llëye llëm ga llëye tjeng sirawa li döya ba shjiryö drete» le.

Dwla wen sorë

²⁶⁻²⁷ E irgo ga Jesús tjlë ba kong obi ga «Sbö ber no pjluyo sorë, e so dwla sguina domer kjlararë kjoyoe. Dwla, e sguina beno klung sho kjing go, ga domer li shrono iröng ba ushko. Eshko ga pë, wollen, ga bë sök wlëpe. E wopro ga dwla sguina beno tjengli weno, ga kuno, shäryë eni sorë miyde domer lirë llëm gueniyo. ²⁸ Dwla li kun jong laga klung shorë. Kun jem, korga wen, kjing shen, ga bo kwirkë shjiye. ²⁹ Bo kwirkono shjiy kuzong ga domer li jongya ba skok kjwlë jã» le.

Kjor dwlayo chirawa

³⁰ E irgo ga Jesús tjlëno ba kong jek obi. Tjlë ga «¿Sbö ber no pjluyo sorë, e so llë kjoyo? ¿Lër bomi kong sorë ga pjlú? ³¹ E so kjor dwlayo chirawa ko *mostaza* dgoroy klung roy kjoyoe. Dwlagwo ëre chirawa, dwlagwo oblë oblë dorko. ³² Gueniyo kun kësbang, dwlagwo oblë oblë kjinmo. Eshko ga sënwa llë usho ywë ba kowo go» le.

³³ Nopga pina Jesúsde llëbo jyäglo go eni. Kura lok, gueniyo llë loklo miydara lok uunkong llëme. ³⁴ Jesús tjlëno nopga kong llëbo jyäglo go erä. Gueniyo nopga tjeng kësli brikotong lok pjirshko ga llëye lara llëbo jyäglo go li, e llë loklo pjllölgwera ba oppinggaga kong pjire.

Pjluk, di bäng buk kësbang, e ichara Jesúsde

³⁵⁻³⁶ Kjok sëng ga Jesús sök kjoyong roshko obi, ga tjlë ba oppinggaga kong ga «Shji to dipzë, di bäng buk kësbang ëre kjwo kalëkong» le.

Kuya lok ga opyono lok kyyong li roy ga «Tjawa toe» le lok nopga kong, ga to jek ey dwayo. Eshko ga kyyong oblë sökoba jek tjeng ba tjok bakoe. ³⁷ Eshko ga pjluk tjwe jong träk llëm, dbo ara di bäng buk kësbang li kjing go. Di iöya ara, ga di dlin jong kyyong li roy, pir sek seke.

³⁸ Eshko ga Jesús buk pë kyyong sigwo lëkong, kä iak buk kä ioklo kjing go. Eni ga ba oppinggaga jek löng ba wolleng, ga tjlë ba kong ga «Tjlapga no pingga! ;Shji ba pitoe! ;Pja buk wlëp ega?» le.

³⁹ Kuya ga kojono, ga tjlë pjluk, di iöya li kong ga «Pja slanzong. Pja ber tjëkso» le, ga beno buk tjëkso. ⁴⁰ Eshko ga tjlë ba oppinggaga kong ga «;Kjok bangkjrëmi ara ega? ;Pjây mär bor go llëm obire?» le.

⁴¹ Eni ga epga shgawara löng ara. Ga tjlë ëng kong ga «;Kjwe ëro? İzïa. Tjlëno pjluk, di iöya li kong ga kole pjlúe» le.

5

Domer goshko Ä sëya kjlara

¹ Jesús, ba oppinggaga, e dipzono jek öötong löng di bäng buk kësbang li kjwo kalëkong, Gadara kjokyo. ²⁻⁶ Eshko ga domer goshko Ä sëya kjlara. Kjra lëba, shakoba or go ga ä kuzong ga kjrocharaba dröng sho go pjlöglo kop ara, gueniyo ba dröng sho li skoya jek tas tas erä. Ga domer li kjwëy llong llëme. Shaga ërë llëm bakoe. Jëk to shäng sakshko erä. To shäng öö le öö le kjloy. Äär kjone ga opyok to shäng ak go. Eni ga Jesús ïya sak tjeng lishko dwayo ga tek shrono shäng ba zlong bäng ga kjök tono.

7-8 Īya Jesúsdë ga tjlë ba kong ga «ĵÄ sëya, pja opkjös domer kjwe go dwayo!» le.

Kuya ga tjlë ba kong dbo go ga «ĵSbö Tjwlö Kësbangyo Wa li pja! ĵPja tek shäng bor barwë ega? ĵRokër bop kong sira Sbö ko go ga tja shdum llëme!» le.

⁹ Kuya ga tjlë ba kong ga «ĵPja ko llë?»

«Tja ko Kop Arae. Tjawa sëya ara domer ëre go kjÿy» le. ¹⁰ Eshko ga tjlë lok ba kong obi ga «Rokër bop kong sira ga tjawa ichëp kjok ëreshko dwayo llëme» le ba kong eni kop arae.

¹¹ Epga lönglishko soshko ga köchi tjeng träk llëm dlup poglo go, ië. ¹² Eni ga sëyaga li tjlë Jesús kong ga «Rokërwa bop kong sira ga tjawa ichos jek köchi tjeng kjwe go» le.

¹³ Kuya ga «Jölö» le, ga sëyaga li opkjono to lok domer li go dwayo, ga jek lok köchi li go shara. Wop eni llëm ga köchi tjeng li zrono jer ri ri dlup poglo go, optono lok jer uunkong di bäng buk kësbang li roshko, ga shteno lok dret eshko. Köchi shteno li kop sak dbäw dbäw pjloglo pjök (2,000) dik.

¹⁴ Eni ga köchi dagaga tjeng li töktong jek ey dwayo, ga öötong löng nopga löngshko ga llëye shäryono li roy lara nopga kong pjire. Kuya lok ga tek shrono löng ara ba ĩk. ¹⁵ Shrono löng Jesús shäng lishko ga ĩya lok ga domer dämär ga goshko Ä sëya li, e wlëna lok bë sök eshko, doyono pjir shwong go, skwë ame, poptono sök pjluë. Īya lok eni ga beno löng sëya llëme. ¹⁶ Llëye shäryono domer li tjok, köchi li tjok, e lara ba ĩgaga tjeng eshko lirë nopga shrono tjeng li kong. ¹⁷ Eshko ga

nopga li tjlē Jesús kong ga «Rokërwa bop kong sira ga pja opshis kjok ëreshko dwayo» le.

¹⁸ Kuya ga jlō lara. Jer opyë kjoyong royshko ga domer poptono li tjlē ba kong ga «Rokër bop kong sira ga tja ios jek bop tjok» le.

¹⁹ Kuya ga tjlē ba kong ga «Llëme. Pja nom bop ushko iröng dey. Llëye shäryara Tjlapgarë bop kong li, pja songe lara sorë li, e lëp bop pjeyoga uunkong kong, miyde lok wlo» le.

²⁰ Kuya ga jlō lara, ga to jek öötong shäng kjokyo ko Decápolis. Eshko ga e poptara Jesúsde sorë li roy le öötong shäng oba kong eshko. Kukoba ga woyotjlkoba beno löng arae.

Kjoglo wolono buk kjlara, walë swlo ara kjlara

²¹ E irgo ga Jesús dipzono jek iröng di bäng buk kësbang li kjwo kalëkong. Öötong shäng di kjako ga oba tōno löng träk llëm eshko. ²² Eshko ga domer shäng kjlara ko Jairo. Judíoga syō uyo jong eshko li kägäyoga shäng kjlara li e. Jesús ÿya ga tek shrono shäng ba zlong bäng ga kjök tonο, kujono bokdo kjlay klung go, ²³ tjlē ba kong ga «Bor wa walë buk ba llëmdo, shinmotkokdoe. Rokër bop kong sira ga kayo ÿp bor kong. Pja orkwo ië ba kjing go, poptëp wlo, shinmotkë llëm wlo» le.

²⁴ Kuya ga to jek ba tjok.

Oba ara kjïshko ga Jesús jëk shängshko ga pollikoba arae. ²⁵ Löng li tjrëko walë shäng kjlara swlo ara lu pjloglo sak kjwara kjingsho pjök (12) tjän. Ba dbar ÿya ÿyado, poptë llëme. ²⁶ Öör shäng dwlomnega ara shwoy ga ba dburwa tjeng li zana drete. Eni ëmdë ga poptono llëme. Miga beno shäng ro bang ara jek këgong. ²⁷⁻²⁸ Bäm

go ga Jesús roy miydara, ga wotjlik ga «Tja to ik. Tja öötong shäng ba shwoy ga ba shwong worbo porwër dö ga tja poptë» le. Eshko ga tek shrono shäng Jesús zlong bäng ba kokso shwo lëkong ga ba shwong worbo porwara, ²⁹ ga poptono jekdo eshko. Opkuk ga beno shäng pjlu, swlo ame.

³⁰ Jekdo eshko ga Jesús wotjlik ga «Miydër ga ëbo poptono, llëbo shäryono bor dbo kësang go» le. E kjishko ga İya iröng ga tjle oba kong ga «¿Bor shwong porwaga ërë?» le.

³¹ Kuya ba oppinggagarë lok ga tjle ba kong ga «Nopga ara kuzong ga pja polliya löng bop zlong bäng pjlor kar kare. ¿Eni ga “¿Tja porwaga ërë?” lep sorëro?» le.

³² Gueniyo jlö lara llëme. İya beno shäng obi kjarashko kjarashko, porwaga ërë miyde wlo.

³³ Eni ga walë lira ommydë shäng pjluë. Ga tek shäng Jesús zlong bäng ga kjök tonö sök kjlo dete erä. Eshko ga llëye shäryono ba kong li lara ba kong pjire.

³⁴ Kuya ga tjle ba kong ga «Pja mär bor go kuzong ga pja poptonoe. Pja nom wopjlu bop ushko. Pja woydë ame. Bop swlo, e wen bop kong ame» le.

³⁵ Jesús tjle shäng walë li kong wopro ga nopga tek shrono löng Jairo ushko dwayo ga tjle Jairo kong ga «Bop wa yë shinmotkonoe. Tjlapga no pingga kjwe twëy tjötö ame» le.

³⁶ Kuya Jesúsde ga jlö lara llëme. Tjle Jairo kong ga «Pja woydë llëme. Pja mär bor go erä» le.

³⁷ Eshko ga Jesús to jek Jairo ushko. Ba opping-gaga tjeng ba tjok doglo mya li jek söra ba yorkë, Pedro, Santiago, Santiago kjarayo Juan bakoe.

Llamo söra jek ba tjok llëme. ³⁸ Öötong löng ushko ga ÿya Jesúsdë ga nopga slar wopjluk jong tråk llëm, kjloshtë ara bakoe. ³⁹ Eni ga opzrëno jek shäng u li roy ga tjlë löng li kong ga «¿Pjây slar ara kjweni ega? Kjoglo, e wolono llëme. Buk pë erä» le. ⁴⁰ Kuya lok ga joywe lok jong erä.

Gueniyo ga epga ichara opshik pjire. E irgo ga opzrëno jek öötong shäng kjoglo buk lishko, kjoglo li data, mekë tjok, ba oppinggaga tjeng ba tjok li tjok bakoe. ⁴¹ Eshko ga kjoglo li orkwo shara, ga tjlë ba kong ga «¿*Talítá cum!*» le. (E «Kjwozirwa, pja kojözong» loklo.) ⁴² Jekdo eshko ga kjoglo li kojono, ga jëktonge. Kjoglo li lu pjloglo sak kjwara kjingsho pjök (12). ÿya löng lirë ga beno löng yëy le erä. ⁴³ Gueniyo Jesús tjlë ba kong lok ga «Llëye shäryono jüshko ëre lëmi ë kong llëme» le. Ga ba data, ba mekë, e ichara ba wa li sëng.

6

Jesús shäng Nazaret kjokyo

¹ E irgo ga Jesús opshino to ey dwayo ba oppinggaga tjok, ga jek öötong löng ba kjokshko, tek chirawa ga kuno shäng lishko. ² Ga öötong woshtozlong dbaryo ga Jesús opzrëno jek judíoga syō uyo jong eshko li roshko, ga nopga pina. Kuya lok ga nopga ara beno löng yëy le erä. Ga tjlë ëng kong ga «¿Kjwe kjok miydë ara opping kjone? ¿Kjok miydë ara li twaga ërë? ¿Llëbo ÿydëba llëm wleniyo shärye sorë? ³ ¿U shäryaga wle kjwe llëmdo? ¿Mekë María llëmdo? ¿Lëmga Santiago, José, Judas, Simón llëmdo? ¿Dorga löng na bi tjok bako llëmdo?» le eni. Ga tjlökwo kjre lok woydë llëm, iirkë lok ara erä.

⁴ Eshko ga Jesús tjlě ba kong ga «Kjok kjone pogo ga Sbö tjlökwö laga, e iěba tjlwłö ara. Gueniyo ba kjok om go lishko, ba ushko ga iěba tjlwłö llěme» le.

⁵ E kjĩshko ga llěbo ĩyděba llěm wleniyo to shäryara kjok eshko sopga kong ara llěme. Orkwo iono swlopga pjökde myare kjing go, ga poptara. Llěbo oblě shäryara llěme. ⁶ Ga Jesús beno shäng wotjlik ara, kjok eshko sopga mär ba go llěm kjĩshko.

Ba oppinggaga doglo sak kjwara kjingsho pjök (12) li poshduna Jesúsdě

E irgo ga Jesús to jongya oba ping shäng kjok shto oblě oblě ber lok soshko wleniyoshko. ⁷ Öötong shäng shto kjrınashko ga ba oppinggaga doglo sak kjwara kjingsho pjök (12) li rokara, ga ichara jek pjök pjöke. Kong dbo twara, Ä sěyaga iche wlo. ⁸ Brikdě lok llěm obishko ga tjlě ba kong lok ga «Pjāy brikshko ga llěbo sömi ara llěm, bomi kjorkung döe. Pjāy dli sök llěm, kjla llěm, dbur sho llěm bakoe. ⁹ Shwong pjang bomi do go li sömi ga pjlú, drepkwota bako, gueniyo shwong oblě, drepkwota oblě, e sömi llěme. ¹⁰ Pjāy äär kjone pogo ga pjāy ber lōng u kjwaraso, äär jong pjāy opshik kjok eshko dwayo guing. ¹¹ Pjāy öötong lōng kjone ga pjāy wlokjre llěm, pjāy kuya llěm wleni ga pjāy opshik kjok eshko dwayo, ga bomi dre pjlungyo lōzĩ ber tjeng eshko. E ber pjāy kura lok llěm li jyāgłö, ga owa li ber pjang ba go» le.

¹² Eni ga epga to jek lōng tjlě oba kong ga «Llěbo owa shäryěmi lōng li, e owa jlōe lozĩ, ga rayozĩ» le.

¹³ Eshkoshko ga nopga goshko Ä sěyaga wlěna ara,

ga sëyaga'li ichara to drete. Swlopga ara, e dlu kjing go kjoy kwona, ga poptara.*

Juan No Waga zröra

¹⁴ E dbaryoshko ga Jesús roy shdöktong kjone pogoshko. Ga kura Pjlu Herodesdë. No kjone kjone tjlë ga «E Juan No Waga'li woshrokdo. Lläbo ÿdëba llëm wleniyo shärye ga pjlú e kjishko» le.

¹⁵ Kjone kjone tjlë ga «E Sbö tjlökwo laga tek dënashko so Elías tjwayde shäng» le. Kjone kjone obi tjlë ga «E Sbö tjlökwo lagaga tek dënashko so oblë'li kjoyoe» le. ¹⁶ Gueniyo ga oba tjlëno'li kuya Herodesdë ga tjlë ga «E Juan. Tja no ichono ba kägä zë kjupargue. E woshrokdo shäng» le.

¹⁷⁻¹⁸ Herodes shjiy ko Felipe. Ba boy ko Herodías. Kjupäshko ga Herodías kjrara Herodesdë beno sök ba boy shara. E kjishko ga Juan tjlë Herodes kong ga «Herodías kjwe kjrëp ber bop boy wlo ga ä, e bop shjiy Felipe boy kjishko. Tak pjang kjok ilgwekklo tara Moisésdë'li go eni» le. E kjishko ga nopga ichara Herodesdë Juan shak, bängzaya wlo, shdüya wlo.

¹⁹⁻²⁰ Eni ëmdë ga Juan bangkjre Herodesdë ara. Wotjlík ga e domer pjlo bek, iara Sbörë beno shäng dboy Sbö kong le. Juan tjlökwo'le'li kuya pjloglo ara, kuya ä kjishko, woyotjlíya ara ëmdë. E kjishko ga Juan wlikara. Herodíasda omíywō shjiktëng, e tjlëno sorë'li kjishko. Zröya woydë, gueniyo Juan wlikara Herodesdë kuzong ga zröya ga äe.

²¹ Öötong Herodes shrëzlong dbaryoshko ga Herodes dli shäryono ara, ga nopga parkë ba tjok

* **6:13** Eshko dbaryo ga kjoy kwonaba swlopga dlu kjing go, ba dwlomnekklo.

li mana ië ba tjok. Ba p̄jloyoga, ba ëngkjwaga kägäyoga, domerga Galilea so tjwłõ ara wleniyo, e mana, ga shrono lok, ië wlo.

Eshko ga nopga ara li İya Herodíasdë ga wotjlik ga «Juan, e wolon dbaryo öötonge» le. ²² E irgo ga Herodías wa walë shrono shäng ga bërkononopga löng kës li boksho. İya lok ga beno löng wopjluë. E kjishko ga Herodes tjlä ba kong ga «İläye woydëp li rokos bor kong, ga twër bop kong. ²³ Lër bop kong jlökoyo ga kjok ichër sök li ëmdë ga “Woydër bëye” lëp bor kong ga twër bop kong» le.

²⁴ Kuya ga opshino jek ba mekë shwoy. Tjlä ba kong ga «¿Era İläye rokër?»

«Juan No Waga kägä rokopdë» le ba kong.

²⁵ Eni ga kjoglo li jekdo shäng maling p̄jlu shwoy, ga tjlä ba kong ga «Woydër ga no ichëp Juan No Waga li kägä zë, ga tek söp bor kong kjwlä roshko» le.

²⁶ Kuya ga woydë jonge. Gueniyo «İläme» le ba kong woydë İläm, tjläno jlökoyo nopga mana löng li boksho kjishko. ²⁷ Eni ga no ichara kjlara Juan kägä li zë no shdüzlong uyo roshko, tek söya ba kong wlo. ²⁸ Eni ga no li jek öötong shäng no shdüzlong uyo ga Juan kägä zara tas, ga söra, twara kjoglo li kong kjwlä roshko. Eshko ga kjrara, ga söra, twara ba mekë kong.

²⁹ Roy kuya Juan oppinggagarë ga öör lok ba doyo kjrë, ga söra, jnena lok sakshko.

Jesús nopga sëno doglo sak dbäw dbäw p̄jloglo shkëng (5,000)

³⁰ Sbö tjläkwo roy lagaga Jesús äska li shrono löng iröng obishko ga İläye shäryara lok, Sbö tjläkwo lara

oba kong sorë, e lara lok Jesús kong pjire. ³¹ Jesús sökshko ga nopga tjwe jong ara ga brik jong eni bakoe. Eni kuzong ga dbar epga kong ië wlo ëmdë ga äe. E kjïshko ga Jesús tjlë ba oppinggaga kong ga «Shji to jongya kjok shto oblë, kjok kjing, no llëm wleniyoshko, shji woshtë wlo» le.

³² Eni ga opshino jek ey dwayo, ga opyono jem lok kyyong roshko, ga to kjok shto oblë, ber löng tjoksa wlo le. ³³⁻³⁴ Gueniyo opshinoshko ga ña nopga ararë. Ga nopga kjok shto oblë oblë so to jek lok ba irgo pjö'lekong. Jesús opshino kyyong roshko dwayoshko ga nopga ëng töno träk llëm li ña, ga songe le. Wotjlik ga epga öng wlëp ushko so daga llëm wleni le. E kjïshko ga epga pina ara.

³⁵ Kjok ro zar kjwlë kuzong ga ba oppinggaga tjlë lok ba kong ga «Kjok sëng tjän. Kjok ëreshko llëye drete. ³⁶ Pjlú wlo ga nopga kjwe ichos to na dwayo, jek llëbo soynekoba kjone lishko, dli tjwlëk wlo» le.

³⁷ Kuya ga tjlë ba kong ga «Sëzi pjäydë dey» le.

Kuya lok ga tjlë ba kong ga «Sëy uunkong wlo ga woyde ga dbur bayo domer parkono dbargwo sak dbäw pjloglo pjök (200) äska wleni. ¿Shäryërwa sorëro?» le.

³⁸ Eni ga tjlë ba kong lok ga «¿Pjäy pjlung shosho suk pjir tjeng kjwobi? To ñmia» le.

Öör ña, ga tjwe löng iröng ga tjlë ga «Ëreshko pjlung shosho suk pjir tjeng kjwo shkëng (5), mã tjeng do pjök bakoe» le.

³⁹ Kuya ga epga ichara nopga tjeng kjlobi li ichë wlar uunkong töshko, shkwamsho kjing go.

⁴⁰ Kuya lok ga nopga wloktong töshko, shtor shtor, kjoneshko ga doglo sak dbäw (100), kjoneshko ga doglo sak shkëng (50).

⁴¹ Pjir ga pjlung shosho suk pjir kjwo shkëng (5) li, mã do pjök li, e kjrara Jesúsde, ga kjok dogo ãya jem drëng ga tjlë Sbö kong ga «Tjawa kong dli tworop ëre. Tjawa ber wopjlú bop tjok e kjïshko» le. E irgo ga pjlung shosho suk pjir li tora, ga twara ba oppinggaga kong. Ga pjlorgara lok nopga tjeng kës li kong. Mã do pjök li shdöra uunkong kong bakoe.

⁴² Nopga uunkong iono beno löng bö tjung, wopjlúe. ⁴³ E irgo ga dli worbo tona ba oppinggagarë lok shing roshko, beno tjeng shing kjwo sak kjwara kjingsho pjök (12), tjung tjunge.

⁴⁴ Domerga iono uunkong ga doglo sak dbäw dbäw pjloglo shkëng (5,000). Walëga, kjwozirga, e shtak llëme.

Jesús jëktong di kjing go

⁴⁵ E irgo ga Jesús ba oppinggaga ichono opyë kjyong roshko, dipzë di bäng buk kësbang li kjwo kalëkong wlo, äär ber löng Betsaida kjokyo shwo lëkong wlo. Ga nopga brik wopro ga Jesús beno shäng eshko. ⁴⁶ Nopga briktong pjir ga Jesús jem öötong shäng dlup go tjoksa, syöshtë Sbö kong eshko wlo. ⁴⁷ Kjok ro zoktong ga shäng eshko tjoksa.

Eshko ga ãya ga kjyong li jek öötong buk di bäng buk kësbang li roworbëe. ⁴⁸ Ga pjluk tek jong ba shwo lëkong. E kjïshko ga kjra le lok ba kjyong li roshgue jong ba kjlongkwang go. Kjok ba shränto ga Jesús jek jëk shäng di bäng buk kësbang li kjing go, dipzë kjwo kalëkong wlo lara. Gueniyo öötong jek shäng ba oppinggaga li soy ga ⁴⁹ ãya lok ga tjlë ëng kong ga «¡Kjwe äya jlöe!» le, ga öö le lok ara. ⁵⁰ ãya lok uunkongdë ga bangkjre beno löng ara.

Jekdo eshko ga Jesús tjlě ba kong ga «¡Pjãý wok-jange! ¡Tja li jekdo shäng! Llěye bangkjrěmi llěme» le.

⁵¹⁻⁵² E irgo ga jem opyono kjylland li roy, ga pjluk li beno tjěksoe. Eshko ga epga beno löng yěy le erä. Llěye kuya woydē llēm kjĩshko ga pjlung shosho suk pjir twara oba ara kong li, e llě loklo to miydara lok llēm, ga beno löng wotjlik ara e kjĩshko.

Swłopga poptara Jesúsde Genesaret kjokyo

⁵³ Dipzono lok di bäng buk kěsbang li kjwo kalěkongshko ga öötong löng Genesaret kjokyo. ⁵⁴ Eshko ga opshik lok kjylland roy dwayoshko ga nopga löng eshko kjlěbö. Miydara lok ga kjwe Jesús le eni. ⁵⁵ Eni ga roy shdöra lok kjok eshko kjwang jĩkong. E kjĩshko ga swłopga sökoba swło sökkłö roy, tjwe jong llaw pogo, öötong löng Jesús jěk shäng lishko. ⁵⁶ Eni ga äär kjone pogoshko ga swłopga söraba, iaraba tjeng llěbo soynezlong irbo sor go llögong llögong. Ga tjlě lok Jesús kong ga «Swłopga kjwe ichos bop shwong worbo porwě sira dōe» le ba kong. Ga porwara, ga poptono jekdo uunkong.

7

Nopga äär ber owa Sbö bokso sorě

¹ Pjłara ga no pinggaga kjok llgwekklo tara Moisésde li go, fariseoga kjone kjone, e tjwe löng Jerusalén kjokyo dwayo, ga tek shrono löng Jesús shwoy. ² Eshko ga ĩya lok ga Jesús oppinggaga kjong kjong iono, orkwo shwoyde llēm obishko. E kjĩshko ga lãywe lok owa. ³ (Fariseoga, judioga llamo li, e ioydē llēm obishko ga orkwo shkwě

yõtso enido, ba tɔlapgaga tek dēnashko so sdēkwo sorē ga eni.* ⁴ To llēbo soynezlong ga tjwe ushko irōng ga orkwo shkwē e kjoyo enido, llēm ga iē llēme. Ga ba llēbo ioklo, e kwoshkwe lok pjir bako, ba di bapkwō shāryak klung shosho go, ba sbi shāryak drōng sho go, ba ioklo bako, lara ba pjeyoga tek dēnashko so lirē sorē ga eni. Sgara beno lōng llēbo shāryē oblē oblē, e kjoyo kjoyo eni bakoe.)

⁵ E kjīshko ga tjlē lok Jesús kong ga «¿Bop op-pinggaga kjwe, bi tɔlapgaga tek dēnashko so sdēkwo bangkjre lok llēm ega? Iē lokshko ga orkwo shkwē llēme» le.

⁶ Kuya ga tjlē ba kong ga «¡Pjāy Sbō tjlōkwo sōga jlōkoyo lēmi, gueniyo pjāy wotjlik owa bomi pjlušhko! Llēye lara Sbō tjlōkwo laga tek dēnashko so Isaíasdē bomi kjīshko li, e jlōe. Tjlēno beno eni: »“Nopga ēre, tja poshrēya ba kjamo go,

gueniyo tja woyotjlīya pjang ba pjlušhko llēme.

⁷ No pīya kjok llgwekklo taga norē li go erōe.

E kjīshko ga tja poshrēya lōng li llēno llēme.”†

⁸ »Sbō kjok llgwekklo li sōmi iyado llēme. Pjāy ber lōng no sdēkwo shāryē dōe. ⁹ Sbō kjok llgwekklo li kolēmi llēm, bomi sdēkwo shāryēmi wlo. ¹⁰ Moisés tjlēno tek dēnashko ga “Bomi dataga, bomi mekēga, e bangkjrozī, iozī ber tjwlō ara.”‡ Tjlēno obi ga “Ēye ba data, ba mekē, e āyoshtono ga e zrōkko.”§

¹¹ Gueniyo ga pjāy tjlē ga ēye tjlēno ba data, ba mekē kong ga “Pjāy kjimtēr ga āe. Bor llēbo

* **7:3** Shāryara lok eni, woydara Sbōrē eni kjīshko lara, miga eni llēme. † **7:7** Isaías 29.13. ‡ **7:10** Éxodo 20.12; Deuteronomio 5.16. § **7:10** Éxodo 21.17; Levítico 20.9.

uunkong ëre tworor tjeng Sbö kong pjire” lara ba kong pjir ga ¹² ba data, ba mekë, e kjimte ame ga pjlúe lëmi eni. ¹³ Eni ga bomi sdëkwo pimi oba kong li kjishko ga Sbö tjlökwo li ioromi beno tjwlö llëme. Ga pjäy llëbo shäryë owa oblë oblë e kjoyo bakoe» le.

¹⁴ Eshko ga nopga rokara tek ba zlong bäng obi, ga tjlë ba kong ga «Tja kuzi uunkong, miydëmi wlo. ¹⁵⁻¹⁶ Nopga äär ber owa Sbö bokso laga dli ue lirë llëme. Miga ber löng äär ba bokshto wlo laga ba wotjlik wen ba pjlúshko lirë* » le.

¹⁷ Tjlëno oba kong pjir ga opshino jek ey dwayo, ga opzrëno jek öötong shäng u jong kjwara eshko li roshko. Eshko ga ba oppinggaga tjlë lok ba kong ga «Rokërwa bop kong sira ga llëye lëp shäng oba uunkong kong yë, e llë loklo los borwa kong, miydërwa wlo» le.

¹⁸⁻¹⁹ Kuya ga tjlë ba kong ga «¿Llëye lër shäng li llë loklo miydomirë llëm obire? Nopga äär ber owa Sbö bokso laga dli uara lirë llëme. Dli uëy li jer äär ber tjeng bi bö roshko. Pjir ga tur bi roy dwayo. E äär ber tjeng bi pjlúshko llëme. E kjishko ga shji äär ber pjlo bek Sbö bokso dli kjishko llëme» le. Tjlökwo lara Jesúsde shäng li, e dli uunkong uëy ga pjlúe loklo.

²⁰ Pjir ga tjlë obi ga «Nopga äär ber owa Sbö bokso laga ba wotjlik wen ba pjlúshko lirë. ²¹⁻²² No wotjlik owa, pë no orkwosmono ba tjok llëm li tjok, no zrök, pë walë ba boy llëm li tjok, lürkë, wotjlik

* **7:15-16** Tek dënashko ga kjibokwo ëre jyä shiraba oblë oblë ara. Ga kjone kjone tjlë ga «Miga ber löng äär ba bokshto wlo laga ba wotjlik wen ba pjlúshko lirë. Eye kwomgwo tjok ga woyde ga kuya yötso.»

dbur töng ba kong erö, llëbo shäryë oblë kong owa, oba jyäp gwë, llëbo owa shäryë lötkë llëm wleniyo, wotjlik owa oblë tjok ba llëbo kjishko, oblë läywë owa, opyë woydë ber tjwlo ara oblë kjinmo, llëbo shäryë wotjlik llëm, e wen tëm ba pjlúshko dwayo uunkong. ²³ Nopga äär ber owa Sbö bokso laga llëbo tjeng kës ëre wen ba pjlúshko lirë» le.

Walë judío llëm wleniyo mär Jesús go jlökoyo

²⁴ Jesús opshino to kjok eshko dwayo ga jek öötong shäng Tiro kjokyo. Eshko ga u wlëna jong kjwara ber sök eshko miydëba llëm wlo lara. Gueniyo öötong sök eshko li miydarabae. ²⁵⁻²⁶ Kjok eshko ga walë sök kjlara, e judío llëm, e Fenicia so. Fenicia kjokyo, e Siria kjokyo obi. E wa sök kjlara walë, kjwozirwa wleniyo, goshko Ä sëya kjlara. Jesús roy miydara walë lirëshko ga tekdo shrono shäng ba zlong bäng ga kjök tonu, tjlä ba kong ga «Tja wa sök kjlara ushko walë, goshko Ä sëya kjlara. Rokër bop kong sira ga sëya li ichëp to bor kong» le.

²⁷ Gueniyo kuya ga tjlä ba kong ga «Woyde ga bi wapga ië bäm go. Bi wapga dli li döy, twëy shjiti kong wlo ga äe» le.†

²⁸ Kuya ga tjlä ba kong ga «Jlëe, Tjlapga. Gueniyo wapga li iëshko ga ba dli pjloyo lon ter töshko ga ue shjitirë ga pjlúe» le.

† **7:27** Eshko dbaryo ga nopga judío llëm wleniyo kowara judiógarë shjiti, epga pjeyo oblë kjishko. Eni ga shjiti lara walë li kongshko ga e nopga judío llëm wleniyo layde. Ga llëbo ichara Sbörë judióga kong li, e ber nopga judío llëm wleniyo kong llëme layde.

²⁹ Kuya ga tjlě ba kong ga «Tja dboryorop eni kjışhko ga pja woydē ame. Pja nom irōng bop ushko. Ā sēya pjang bop wa go li to tjān» le.

³⁰ Walē li to ey dwayo. Öötong shāng ba ushko ga ba wa li wlēna buk ba bukklo kjing go. Ā sēya li to tjān.

Domer kjok kugö llēm, tjlě ma wleniyo poptara Jesúsdē kjlara

³¹ E irgo ga Jesús opshino to Tiro kjokyo dwayo, jongya Galilea di bāng buk kēsbang bukshko. Jek shāng li jek jong Sidón kjokyo ga öötong shāng Decápolis kjokyo. ³² Eshko ga domer sök kjlara kjok kugö llēm, tjlě ma wleniyo. Domer li sōraba Jesús zlong bāng, ga tjlě lok ba kong ga «Rokērwa bop kong ga pja orkwo ios domer ēre kjing go sira, poptēp wlo» le.

³³ Kuya ga domer li orkwo shara, ga sōra jek nopga ara lōng lishko dwayo pjola sira. Öötong lōng eshko ga Jesús sakkwo zrēno domer li kwomgwo bāng kar kare. E irgo ga ba sakkwo shira irōng, ga pōra ba trōng go, ga domer li kjyorkwo porwara ba sakkwo go. ³⁴ Eshko ga kjok dogo ĩya jem drēng ga tjwlō shrono rong, domer li songe le kjışhko. Ga tjlě domer li kong ga «*¡Efatá!*» le. (E «Kwom ro, pjāy roshwīzong» loklo.) ³⁵ Jekdo eshko ga domer li kwom ro tuk li roshwino beno kjok kugö pjlúe. Ba kjyorkwo li dōktong beno tjlě pjlú bakoe.

³⁶ E irgo ga Jesús tjlě nopga lōng li kong ga «Domer ēre poptoror lēmi ē kong llēme» le. Gueniyo jlōlara llēme. «Lēmi llēme» le Jesúsdē jek obi. Enira kuya lok ga roy shdōra lok jek kēgong.

³⁷ Eni ga nopga beno löng yëy le erä. Ga tjlë lok ëng kong ga «İlëbo shärye kës li, e owa llëme. Nopga kjok kugö llëm wleniyo ie ber shäng kjok kugö wëlle. Nopga tjlë llëm wleniyo ëmdë ga ie ber shäng tjlë bakoe» le.

8

Jesús nopga sëno doglo sak dbäw dbäw pjloglo pkëng (4,000)

¹ Dbar kjwara ga nopga shrono töno löng ara Jesús sök lishko. Dli llëm kuzong ga ba oppinggaga rokara Jesúsdë tek ba zlong bäng, ga tjlë ba kong ga ² «Nopga kjwe löng bor tjok na öötong dbargwo mya, ga llëye uako llëme. E kjışhko ga songe lër. ³ Jek ichër ba ushko ië llëm ga äe. Kjone kjone tjwe pjola dwayo. E kjışhko ga wopjir irbo kjwe» le.

⁴ Kuya lok ga tjlë ba kong ga «¿Nopga träk llëm kjwe sëy sorë? ¿Kjok no llëmshko ëre dli wlëy kjone?» le.

⁵ Kuya ga tjlë ba kong ga «¿Pjây pjlung shosho suk pjir tjeng kjwobi?»

«Tjeng kjwo kjäk (7)» le ba kong.

⁶ Eni ga nopga li ichara Jesúsdë wlar uunkong töshko. Pjir ga pjlung shosho suk pjir kjwo kjäk (7) li, e kjrara, ga tjlë Sbö kong ga «Tjawa kong dli tworop ëre. Tjawa ber wopjlú bop tjok e kjışhko» le. E irgo ga dli li tora, twara ba oppinggaga kong. Ga pjlogara lok nopga tjeng kës li kong.

⁷ Mä tjeng kjlöbö chilawa bakoe. Eni ga Jesús tjlë Sbö kong ga «Tjawa kong dli tworop ëre. Tjawa ber wopjlú bop tjok e kjışhko» le. E irgo ga mã li twara

ba oppinggaga kong, pjlorgue lok nopga tjeng kës li kong wlo.

⁸ Eshko ga nopga uunkong iono beno löng bö tjung, wopjlúe. E irgo ga dli worbo tona ba oppinggagarë lok shing roshko, beno tjeng shing kjwo kjäk (7), tjung tjunge.

⁹ Domerga iono uunkong ga doglo sak dbäw dbäw pjloglo pkëng (4,000) dik. Walëga, kjwozirga, e shtak llëme.

E irgo ga nopga briktong pjir ga ¹⁰ Jesús opyono kyyong roshko ba oppinggaga tjok, ga to ey dwayo, jek öötong löng Dalmanuta kjokyo.

Llëbo jyãglo shäryara Jesúsdë llëme

¹¹ Eshko ga fariseoga tek shrono löng Jesús shwoy, ba tjlik wlo. Tjlë ba kong ga «Llëbo ÿdëba llëm wleniyo shäryos borwa kong kjrina, pja ichaga Sbörë jlöre miydërwa e go wlo» le.

¹² Kuya ga tjwlõ shrono rong, ga tjlä ba kong ga «¿Eerishko dbaryo sopga, woydëmi ga llëbo jyãglo shäryër bomi kong ega? Lër bomi kong jlökoyo ga shäryër llëme» le, ¹³ ga rayara beno löng eshko. E irgo ga opyono kyyong roy, ga dipzono jek di bäng buk kësbang li kjwo kalëkong.

Fariseoga, Herodes, ba pjlung shosho uukklo

¹⁴ Ga jek löng kyyong roshkoshko ga miydara ba oppinggagarë lok ga dli söra lok llëm, pjlung shosho suk pjir beno buk kjwara eröe. ¹⁵ Ga Jesús tjlä ba kong lok ga «Pjãy sjëk fariseoga, Herodes, ba pjlung shosho uukklo wle tjok» le.

16 Eni ga epga tjlë lok ëng kong ga «Shji pjlung shosho suk pjir söno llëme. Le shäng bi kong eni e kjishko» le.

17 Tjlë löng ëng tjok llë li miydara Jesúsdë kuzong ga tjlë ba kong ga «¿“Shji pjlung shosho suk pjir söno llëme” lëmi ega? ¿Bor tjlökwo li llë loklo miydomirë llëm obire? ¿Llëye kumi woydë llëm obire?»

18 Pjây bokkwo tjok, gueniyo pjây kjok ïgö llëme. Pjây kwomgwo tjok, gueniyo pjây kjok kugö llëm bakoe. ¿Llëye woyo bomi kong llëmdo? 19 ¿Domerga sënör doglo sak dbäw dbäw pjloglo shkëng (5,000), pjlung shosho suk pjir kjwo shkëng (5) goshko ga dli beno obi tönomi shingyo kjwobi?»

«Shingyo dlinorwa kjwo sak kjwara kjingsho pjök (12)» le lok ba kong.

20 Eshko ga tjlë ba kong lok obi ga «¿Domerga sënör doglo sak dbäw dbäw pjloglo pkëng (4,000), pjlung shosho suk pjir kjwo kjäk (7) goshko ga dli beno obi tönomi shingyo kjwobi?»

«Shingyo dlinorwa kjwo kjäk (7)» le lok ba kong.

21 Eni ga tjlë ba kong lok ga «¿Eni ga bor tjlökwo llë loklo miydëmi llëm obire?» le.

Domer kjok ïgö llëm wleniyo poptara Jesúsdë kjlara

22 E irgo ga Jesús öötong shäng Betsaida kjokyo. Eshko ga domer sök kjlara kjok ïgö llëme. E söra shrono löng Jesús zlong bäng, ga tjlë lok ba kong ga «Rokërwa bop kong ga domer ëre porwos sira, poptëp wlo» le.

23 Kuya ga domer li orkwo shara, ga söra jek u lokshko li worbo go. Öötong löng eshko ga Jesús tröng twono domer li bokkwo go, orkwo iara

ba bokkwo kjing go, ga tjlē ba kong ga «¿l̄lēbo ĩgöpde?» le.

²⁴ Eshko ga kjok roĩno, ga tjlē ga «ĩn ga no jēk jonge. Gueniyo ga ĩgör yōtso llēme. E kjīy ga nopga jēk lōng li ĩn ga so kjor kjoyoe» le.

²⁵ Eni ga Jesús orkwo iono ba bokkwo kjing go jek obi. Eshko ga bokkwo poptono, beno kjok ĩgö wēlēe. ²⁶ E irgo ga Jesús tjlē ba kong ga «Pja nom bop ushko. Pja jek äär Betsaida kjokyo guing llēme»* le.

No pjluyo ichara Sbörē shrono shäng li, e Jesús lara Pedrorē

²⁷ E irgo ga Jesús, ba oppinggaga, e jek lōng Filipino Cesarea kjokyo shto oblē oblē. Eshko ga jek lōng irbo ga Jesús tjlē ba kong lok ga «¿Kumi ga tja ē lēba?»

²⁸ «No kjone kjone tjlē ga pja Juan No Waga li woshrokdo le. Kjone kjone tjlē ga pja Sbō tjlōkwo laga tek dēnashko so Elías tjwayde shäng le. Kjone kjone obi tjlē ga pja Sbō tjlōkwo lagaga tek dēnashko so kjlara li woshrokdo le» le lok ba kong eni.

²⁹ Kuya ga tjlē ba kong ga «E ga pjāy e, ¿tja ē lēmi?» le.

Kuya Pedrorē ga tjlē ba kong ga «No pjluyo ichara Sbörē shrono shäng li, e pja» le.

³⁰ Kuya ga tjlē ba kong lok ga «Tja ē lēmi ē kong llēme» le.

Jesús lano ba wolon dbaryo kjīshko

* **8:26** Tek dēnashko ga kjibokwo ěre jyā shiraba oblē oblē ara. Ga kjone kjone tjlē ga «Pja nom bop ushko. Pja jek llēbo weno bop kong li roy lē Betsaida kjokyo guing llēme.»

³¹ Eshko jek lëkong ga Jesús tjlë ba oppinggaga kong ga «Äär dbar kjwara ga no to ter kjok dogo dwayo ëre shdungoba ara guing. Judío tjlapgaga kjok llgwega wleniyo, syöshtaga kägäyoga, no pinggaga kjok llgwekklo tara Moisésdë li go, tja wlokjre lok llëme. Ga tja zrökoba, gueniyo äär dbargwo mya ga tja woshre Sbörë iröng obi» le eni. ³² Llëbo shäryëba ba kong tjwe li, e lara ba oppinggaga kong wëïë, miyde lok wlo.

Kuya Pedrorë ga Jesús rokara tjoksa, ga wlonae. ³³ Gueniyo ga Jesús bojono, ba oppinggaga llamo beno tjeng li ik wlo. Eshko ga tjlë Pedro kong ga «jÄ, pja opkjos bor zlong dwayo! Llëye woyde Sbörë li woyotjlip shäng llëme. Llëye woyde norë li woyotjlipdë shäng eröe» le.

³⁴ Eshko ga ba oppinggaga rokara tek ba zlong bäng, nopga tjeng li rokara eni bakoe. Ga tjlë ba kong ga «Ëye jëk woydë bor tjok jlökoyo ga ber shäng bor woyotjlík iyado, wotjlík llëbo shäryë kjok ëre kjing goshko ame bakoe. Bor kjishko ga llëye shäryëba ba kong llë pogoshko li, e zrökoba pjang kjlös go ëmdë ga e ba kong ga llëye llëme. ³⁵ Ëye wotjlík opdë om go, zrökoba bor kjishko llëm wlo le ga äär kjok dogo llëme. Gueniyo ëye jëk bor tjok jlökoyo, e zröraba bor kjishko, llëm ga Sbö tjlökwo roy pjlu kjishko ëmdë ga era ber sök së iyado kjok dogo. ³⁶ Ëye llëbo tjeng kjok ëre kjing go kës li kjrara tjeng ba wloy ëmdë ga e llëno llëme. Wolono ga öötong kjok dogo llëm ga to jeno ba llëbo li tjok. ³⁷ Shji ber löng së iyado Sbö tjok wlo ga tjwllëkklo kjok ëre kjing goshko drete.

³⁸ »Nopga löng eerishko dbaryo li owa, so domer orkwosmok shäng pjir, gueniyo jëk shäng walë oblë tjok kjoyoe. Lono ga no to ter kjok dogo dwayo ëre tjwe bor Data dbo kãã goshko, bor parkagaga kjok dogo so tjok. Eerishko ga ëye, tja lökyokjre nopga owa boksho ga eshko ga lökyokjrer eni bakoe» le.

9

¹ Ga Jesús tjlë ba kong obi ga «Lër bomi kong jlökoyo ga pjây kjone kjone löng ëreshko wolontë llëm obishko ga Sbö ber no pjluyo dbo ara go sorë li ïmi wëlle» le.

Jesús kjlopswono beno kãã lletlet

² Dbargwo tjer (6) irgo ga Pedro, Santiago, Juan, e söra Jesúsdë jem dboshko, dlup jong kjwara kjókshko li go. Öötong löng tjoksa eshko ga ïna ba oppinggaga jem löng ba tjok lirë ga Jesús kjlopswono, ³ shwong beno pjlublún shjiye. Shji shwong kwoshkwono beno pjlublún stek lëy wleni, gueniyo äär eni llëme.

⁴ Eshko ga ïya lok ga Moisés, Elías, e weno löng lan Jesús tjok eshko. ⁵⁻⁶Eni ga ba oppinggaga beno löng kjok bangkjre arae. Pablo, e llëye lako ba kong wlo drete. Eni ëmdë ga tjlë Jesús kong ga «Tjlapga no pingga, tjawa löng na ga pjlúe. Tjawa ukwang shäryë kjwo mya, bop kong kjwara, Moisés kong kjwara, Elías kong kjwara bakoe» le.

⁷ E wopro ga pjäng sho lono ter kjrina ba kjing go. Ga pjäng sho li roshko dwayo ga ybö kura lok, tjlë ga «Bor wa li ëre. Woydër ara. Ba tjlökwo kuzïa»

le. ⁸ Jekdo eshko ga ñya lok ba sor go obi ga ëye beno drete. Jesúsda beno shäng erä.

⁹ Jer oplong löng dlup li go dwayoshko ga Jesús tjlä ba kong lok ga «Lläye ñnoma yë lanyotkëmi ë kong llëm, no to ter kjok dogo dwayo ëre woshrono iröng obi guing» le.

¹⁰ Eni ga llëye lara lok ë kong llëme. Gueniyo ga «No to ter kjok dogo dwayo ëre woshrono iröng obi guing» lara li, e llë loklo lanyotke beno löng ëng kong.

¹¹ E irgo ga ba oppinggaga löng li tjlä lok ba kong ga «No pinggaga kjok llgwekklo tara Moisésdë li go tjlä lok ga “Borwa pjluyo iche le Sbörë li tjwe ber nopga uunkong pjluyo wlo. Gueniyo ga Elías tjwe bäm go” le. ¿Le lok eni ega?»

¹² «Elías tjwe bäm go jlõe. E tjwe llëbo uunkong poshäryaga. Gueniyo ga no to ter kjok dogo dwayo ëre shdungoba ara guing, ga tja wlojkrëba llëm bakoe. ¿Tak pjang Sbö tjläkwö go eni bako jlöre?»

¹³ Gueniyo lër bomi kong ga Elías shrono öör tjän. Ga kong llëbo owa shäyaraba, woydaraba sorë li eni, tak pjang Sbö tjläkwö go sorë li eni» le ba kong.

Dwlas goshko Ä säya poptara Jesúsde kjlara

¹⁴ Jesús, ba oppinggaga jëk löng ba tjok li, e jer äär löng ba oppinggaga llamo beno tjeng lishko. Ga ñna lok ga nopga tönö ara eshko. E tjrëko no pinggaga kjok llgwekklo tara Moisésdë li go löng kjläbö. Epga löng ënglë Jesús oppinggaga beno tjeng li tjok kar kare.

¹⁵ Jesús tek shäng li ñya nopga löng lirëshko ga beno löng yëye le erä. Ga jek zron jong öötong löng Jesús zlong bäng, wlojkrë lok wlo.

16 Eshko ga Jesús tjlě ba kong ga «¿Pjăy lōng ěnglě kar kar, llěro?» le.

17-18 Kuya domer kjlararě ga tjlě Jesús kong ga «Tjlapga no pingga, tja wa shāng kjlara domer, goshko Ā sěya kjlara. Iara beno shāng tjlě llěme. Shaya sěya lirěshko ga dbukza rish buk tōshko erā, ga kjamo ber bung ara, kowo uě shmět, ber buk kjlo des erā. Tek sōror bop kong, poptěp wlo loror, gueniyo tja tjwe ga pja shāng na llěme. Tja tjlěno bop oppinggaga beno tjeng ěreshko wle kong ga “Bor wa ěre, goshko Ā sěya kjlara. Rokěr bomi kong ga ichozī to bor kong sira” loror, gueniyo to ichara lok llěme» le.

19 Eni ga Jesús tjlě ba oppinggaga li kong ga «Pjăy măr Sbō go llěme. ¿Tja ber shāng bomi tjok kjēr āār jong llono, pjăy măr ber lōng ba go wlo? Tja sjeno shāng bomi tjok tjăn. Dwlas li tek sōs bor kong» le.

20 Eni ga dwlas li sōra lok tek ba zlong bāng. Jesús ĩya sěya lirě ga dwlas li dbukza rish buk tōshko erā, ga jek workwě to buk pjuk pjuk klung kjing, kjamo bung erā.

21 Eshko ga Jesús tjlě dwlas li data kong ga «¿Kjwe shăryě kjweni tek llono tjăn?»

«Tek chirawa obishko. 22 Dbura iōk roshko, llēm ga dishko, zrōya wlo kop ara tjăn. E kjishko ga pja dbo ara ba poptoklo tjok ga tjawa songe lozong, tjawa kjimtozong» le ba kong.

23 Kuya ga tjlě ba kong ga «¿Tja dbo ara ba poptoklo tjokde, de llēmde lěp eni ega? ěye măr Sbō go ga llěye shărye ga ā wlo drete» le.

24 Jekdo eshko ga domer li tjlě ga «Tja măr ba go. Gueniyo tja kjimtos măr ba go jek kěgong» le.

²⁵ Tjlë löng eni wopro ga nopga tjwe tön jong ara eshko. İya Jesúsdë ga tjlä sëya 'li kong ga «Ä sëya, dwlas ëre iorop beno kjok kugö llëm, tjlä llëm bakoe. Lër bop kong ga pja opkjös dwlas ëre go dwayo. Ga pja tjwe ba go ame» le.

²⁶ Kuya sëya 'lirë ga öö le, ga dwlas 'li dbukza rish buk töshko erä, ga opkjono toe. Eshko ga dwlas 'li beno buk shinmo wleni, ga no kjone kjone tjlä ga «Kjwe shinmotkono İzong» le. ²⁷ Eshko ga dwlas 'li shara Jesúsdë ba orkwo go, ga kojonae.

²⁸ E irgo ga Jesús opzrëno jek u jong kjwara roshko. Döni ga ba oppinggaga löng ba tjok tjoksashko ga tjlä lok ba kong ga «¿Ä sëya 'li to ichororwa llëm ega?»

²⁹ «Ä sëya eniyo ichëmi wlo ga woyde ga pjây syöshhtë Sbö kong ara guing»* le ba kong.

Jesús lano ba wolon dbaryo kjışhko pjłara obi

³⁰⁻³¹ E irgo ga to lok eshko dwayo ga jek löng uunkong Galilea kjokyo. Ba oppinggaga piya woydë tjoksa kuzong ga woyde ga öötong löng kjone li miydaga ërë llëme. Eni ga tjlä ba oppinggaga kong ga «No to ter kjok dogo dwayo ëre twëba ber tjeng nopga wloshko, ga tja zröya lok. Gueniyo äär dbargwo mya ga tja woshre Sbörë iröng obi» le. ³² Llëye le shäng 'li llë loklo miydara lok llëme. E llë loklo kjakroke lok woydë ba kong, gueniyo kjakrokara lok llëm, bangkjre lok ara kjışhko.

Ëye tjwłö ara anmoyö

* **9:29** Tek dënashko ga kjibokwo ëre jyâ shiraba oblë oblë ara. Ga kjone kjone tjlä ga «Ä sëya eniyo ichëmi wlo ga woyde ga pjây ië llëm, syöshhtë Sbö kong wlo ara guing.»

33-34 Eshko ga Jesús opshino to jongya Capernaúm kjokyo ba oppinggaga tjok. Jek löng irboshko ga ba oppingga kjlara tjlä ga «Tja ber tjwlö ara, pjây uunkong kjinmo» le kjlara obi kong.

Kuya ga tjlä ga «Lläme. Ber tjwlö ara li tja» le. Ga llamo omlë jong e kjoyo bakoe. Tjlä jek löng lan ëng tjok eni irgo ga jek öötong löng Capernaúm kjokyo ga opzrëno jek u jong kjwara roshko.

Eshko ga Jesús tjlä ba kong lok ga «¿Lläye lämi tek löng kar kar ëng kong yë llë?» le. Kuya lok ga beno löng kjing erä. Dboryara lok llëme. Miydara lok pjlu ga llëye lara tek löng ëng kong li, e bëy llëme.

35 Eni ga Jesús wloktong sök, ga ba oppinggaga doglo sak kjwara kjingsho pjök (12) li rokara tek löng ba zlong bäng, ga tjlä ba kong ga «Ëye opyë woydë ber tjwlö ara oblë kjinmo ga woyde ga opyë ber tjwlö chira, ber shäng parkaga oblë kong dey» le.

36 Eshko ga kjwozirwa kjrara Jesúsdë kjlara, ga iara shäng ba tjrëko. Kjrarga tjeng ba wloshko ga tjlä ba oppinggaga kong ga ³⁷ «Ëye, kjwozirwa jüni wlokrara bor kjïshko ga tja wlokrara wleni.† Ga ëye, tja wlokrara ga bor ichaga wlokrara wleni bakoe» le.

«Ëye shäng bi wloyo llëm ga shäng bi shwo lëkong» lara Jesúsdë

38 E irgo ga Juan tjlä Jesús kong ga «Tjlapga no pingga, domer ïnorwa shäng kjlara, Ä sëyaga tjeng oba goshko li iche to shäng bop ko go. Gueniyo ga e bop oppingga bi tjok llëm kjïshko ga tjawa tjläno ba

† 9:37 Eshko dbaryo ga kjwozirga tjwlö ara llëme.

kong ga “Ä sëyaga ichëp Jesús ko go ame” lororwa eni» le.

³⁹ Kuya ga tjlë ba oppinggaga kong ga «jWëyël “Shäryëp ame” lëmi ba kong llëme. Ëye llëbo ïydëba llëm wleniyo shäryë bor ko go ga tja owa le jekdo ga äe. ⁴⁰ Ëye shäng bi wloyo llëm ga shäng bi shwo lëkong. ⁴¹ Lër bomi kong jlökoyo ga ëye, pjây kjimtara, pjây bor nopga kjishko ga pjây sëna di erö ëmdë ga potjwlëkklo tjok tjän.

«Shji no ichë llëbo owa shäryë llëme» lara Jesúsde

⁴² »Ëye, kjwozirwa mär bor go jüni ichara llëbo owa shäryë ga e song jlöe. Shäryayde llëm obishko ga shakko, apkwo kësbang pjrikko ba bëngshko, ga dbukko jer dlung dorong dey. ⁴³⁻⁴⁴ Eni ga bomi orkwo, pjây iche llëbo owa shäryë wleni ga zëmi tas. Pjây opzrëk jek äär Sbö sökshko orkwo kjwara llëm dey ga pjlú, pjây pjë bomi orkwo pjök li tjok, iök pjë jong ri ri sjer llëm shtoyo li roshko llëm wlo.† ⁴⁵⁻⁴⁶ Bomi dre, pjây iche llëbo owa shäryë wleni ga zëmi tas. Pjây opzrëk jek äär Sbö sökshko dre kjwara llëm dey ga pjlú, pjây pjë bomi dre pjök li tjok, iök pjë jong ri ri sjer llëm shtoyo li roshko llëm wlo. § ⁴⁷ Bomi bokkwo, pjây iche llëbo owa

† **9:43-44** Tek dënashko ga kjibokwo ëre jyä shiraba oblë oblë ara. Ga kjone kjone tjlë ga «Pja opzrëk jek äär Sbö sökshko orkwo kjwara llëm dey ga pjlú, pja pjë bop orkwo pjök li tjok, iök pjë jong ri ri sjer llëm shtoyo li roshko llëm wlo. Kjok eshko ga shtä kjer llëm, ga iök sjer llëm bakoe.» § **9:45-46** Tek dënashko ga kjibokwo ëre jyä shiraba oblë oblë ara. Ga kjone kjone tjlë ga «Pja opzrëk jek äär Sbö sökshko dre kjwara llëm dey ga pjlú, pja pjë bop dre pjök li tjok, iök pjë jong ri ri sjer llëm shtoyo li roshko llëm wlo. Kjok eshko ga shtä kjer llëm, ga iök sjer llëm bakoe.»

shäryë wleni ga shimi pjuse. Pjãý opzrëk jek äär Sbö sök no pjluyo ïyado lishko bokkwo kjwara llëm dey ga pjlú, pjãý pjë bomi bokkwo pjök li tjok, iök pjë jong ri ri sjer llëm shtoyo li roshko llëm wlo. ⁴⁸ Kjuk eshko ga shtã kjer llëm, ga iök sjer llëm bakoe.

⁴⁹ »Shji sjëng tjokshko ga shtirgöy dlungna go, an maling llëm wlo. Sbö omshäryë bi kong eni wleni bakoe. Llëbo kjang ie ber bi kong, bi poshdungglo, shji ber pjlú jek këgong wlo.

⁵⁰ »Dlungna, e pjlúe. Gueniyo ga pjlë ameshko ga iëy ber pjlë ba shtoy iröng obi ga äe. Pjãý ber löng dlungna wleni. Pjãý ber löng wopjlú ëng tjok ïyado» le.

10

Shji ëng rayë

¹ E irgo ga Jesús to ey dwayo, jek öötong shäng Judea kjokyo, Jordán diyo kjwo kalëkong. Eshko ga nopga töno ara Jesús shäng lishko obi. Sgara shäng oba ping sorë ga epga pina eshko eni bakoe.

² Eshko ga fariseoga kjone kjone tek shrono löng Jesús zlong bäng, ba tjlik wlo. Tjlë ba kong ga «¿Domer ba boy rayë ga pjlúre?» le.

³ Kuya ga tjle ba kong ga «¿Pjãý ichara Moisésdë llë shäryë?»

⁴ «Domerga ba boy rayë wlo ga ichara Moisésdë kjibokwo ëng rayoklo twe ba boy kong kjwara guing» le lok ba kong

⁵ Kuya ga tjle ba kong lok ga «Llëye kumi woydë llëme. Pjãý ichara Moisésdë ëng rayë eni e kjishko.

⁶ Gueniyo ga dämärshko ga nopga shäryara Sbörë

domer, walë.* 7 E kjışko ga domer ba data, ba mekë rayë, ga orkwosmok walë tjok, ga ber löng kjlaraso wleni.† 8 Eni ga ber pjök ame, ber kjlaraso shara. 9 Töna Sbörë ga e döy llëme» le.

10 Döni ga Jesús opzrëno jek sök u roshko, ga ba oppinggaga tjlä ba kong ga «Tjlapga, ¿llëye lep shäng yë, e llë loklo?»

11 «Domer ba boy rayono, ga orkwosmono oblë tjok wleni ga llëbo owa shäryayde. 12 Walë ba lanma rayono, ga orkwosmono oblë tjok wleni ga llëbo owa shäryayde bakoe» le ba kong.

Llëbo shäryara Jesúsdë pjlú, kjwozirga kong

13 Kjwozirga sökoba jek Jesús kong, Jesús orkwo ië ba kjing go wlo. Eni ga kjwozirga sögaga li wlöya Jesús oppinggagarë löng. 14 İya Jesúsdë ga iirkono, tjlä ba oppinggaga kong ga «Kjwozirga somi llëm, tek wëyë bor shwoy. Eye ber kjwozirga jüni ga Sbö ber ba pjluyo. 15 Lër bomi kong jlökoyo ga eye Sbö tjlokwo kjrë kjwozirwa dik llëm ga äär ber sök Sbö sök no pjluyo İyado lishko llëme» le. 16 E irgo ga kjwozirga li kjrara ba wloshko, orkwo iono ba kjing go, ga tjlokwo lara beno pjlú ba kong.

Domer dbur ara kjlara

17 Jesús opshik to jongya kjok shto oblë le shäng kjwlë ga domer tek zron jong, shrono shäng Jesús zlong bäng ga kjök tono, tjlä ba kong ga «Tjlapga no pingga, pja pjlúe. ¿llëye shäryër, tja ber sök së İyado Sbö tjok wlo?»

* 10:6 Génesis 1.27. † 10:7 Génesis 2.24.

18 «¿Tja pjlúe lèp ega? Pjlú li, e Sbö eröe. 19 Kjuk llgwekklo tara Moisésdë li, e miydëp tjän. Shji no zrök llëme. Shji pë oma boy oblë tjok llëme. Shji lürkë llëme. Shji oblë jyöyotkë llëme. Shji oblë jyäpgwë llëme. Bop data, bop mekë, e bangkjros, ios ber tjwlö ara»† le.

20 Kuya ga tjlä ba kong ga «Tjlapga no pingga, tjläkwo lèp shäng kës li shäryër shäng enido tja tek dwlas lë obishko» le.

21 Eni ga domer li İya Jesúsdë, ga woydara ara. Tjlä ba kong ga «Llëbo shäryorop kës li, e pjlúe. Gueniyo llëbo beno kjrina obi. Pja nom bop llëbo tjeng kës li soynek pjir, ga dburyo twos oba song wleniyo kong. Enira pja llëbo ara kjok dogo. Pjir ga pja tek bor tjok, pja pin wlo» le.

22 Kuya ga beno shäng woydë ara, ga to ey dwayo, dbur ara kjishko.

23 E irgo ga ba oppinggaga İya Jesúsdë ga tjlä ba kong ga «Nopga dbur ara wleniyo äär ber löng Sbö sök no pjluyo İyado lishko wlo ga kjange» le.

24 Kuya lok ga beno löng wotjlik arae. § Eni ga Jesús tjlä ba kong ga «Pjeyoga, ëye äär ber sök Sbö sök no pjluyo İyado lishko wlo ga kjange.

25 Öng jëkklo sok kësbang wleniyo opzrëk jek shkö bokkwo bäng go ga kjange. Gueniyo nopga dbur ara wleniyo äär ber löng Sbö sök no pjluyo İyado lishko wlo ga kjang anmoyö» le.

26 Kuya lok ga beno löng wotjlik ara jek këgong, ga tjlä lok ba kong ga «¿Enira ëye dardo?» le.

† 10:19 Éxodo 20.12-16; Deuteronomio 5.16-20. § 10:24 Eshko dbaryo ga oba wotjlik ga nopga dbur ara wleniyo tjwlö ara Sbö kong, nopga song wleniyo kjinmo lëba.

²⁷ Kuya ga ñya drëng, ga tjlë ba kong ga «Nopga kong ga shärye ga äe. Gueniyo llëye shärye Sbörë ga ä wlo drete» le.

²⁸ Eshko ga Pedro tjlë ba kong ga «Borwa llëbo tjeng kës li rayororwa beno pjir, tjawa jëk bop tjok wlo» le.

²⁹ Kuya ga tjlë ba kong lok ga «Ër bomi kong jlökoyo ga ëye, ba u, ba kjlara, ba data, ba mekë, ba wapga, ba kjok, e rayara bor kjishko, llëm ga Sbö tjlökwo roy pjlú kjrara li kjishko ga ³⁰ äska wlëya ara anmoyō. Kjok ëre kjing go ga wlëya llëye rayara li pjloglo sak dbäw (100) obi: u, pjeyoga, mekëga, wapga, kjok. Gueniyo ga kong llëbo tjwe owa bako, ñywaba shjiktëng, ga bokrotkëba. Gueniyo llono ga ber sök së ñyado Sbö tjok.

³¹ »Gueniyo eerishko ga nopga tjwlö ara wleniyo löng ara li, e ber löng tjwlö chira eshko. Ga eerishko ga nopga tjwlö chira wleniyo löng ara li, e ber löng tjwlö ara eshko» le.

Jesús lano ba wolon dbaryo kjishko jek obi

³² Öötong dbar kjwara ga Jesús jek shäng Jerusalén kjokyoshko ga ba oppinggaga jek löng wotjlík ara, ga oba jek löng ba tjok li kjok bangkjrë ara. Eshko ga ba oppinggaga doglo sak kjwara kjingsho pjök (12) li rokara Jesúsde jek dboshko, lan ba tjok, llëye wen ba kong li kjishko wlo. Eshko ga tjlë ba kong ga ³³ «Shji to Jerusalén kjokyo. Eshko ga no to ter kjok dogo dwayo ëre twëba ber tjeng syöshtaga kägäyoga wloshko, no pinggaga kjok llgwekklo tara Moisésde li go wloshko bakoe. Tja iche lok, zröya wlo, ga tja twe lok nopga judío llëm wleniyo kong. ³⁴ Eshko ga tja joywe lok, tröng

twe lok bor go, tja shpoya lok no shpokklo go, ga tja zröya. Gueniyo äär dbargwo mya ga tja woshre Sbörë iröng obi» le.

Santiago, Juan, e llëbo rokono Jesús kong

³⁵ Eshko ga Zebedeo wapga ko Santiago, Juan, e tek shrono löng Jesús zlong bäng ga tjlë ba kong ga «Tjlapga no pingga, llëye rokërwa bop kong li shäryos borwa kong sira» le.

³⁶ Kuya ga tjlë ba kong ga «¿Llëye shäryër bomi kong ga pjlú?»

³⁷ «Pja ber sök no pjluyo, bop dbo kälä ikoba wëlëshko ga tjawa iëp ber löng bop tjok, or milë kjlara, or këlë kjlara» le ba kong.

³⁸ Kuya ga tjlë ba kong ga «Llëye rokëmi löng bor kong li, e llë miydëmi löng llëme. ¿Pjäy shdungoba, bokrotkëba, zrökoba botoya dik ga pjlú?»

³⁹ «Ëng» le lok ba kong.

Kuya ga tjlë ba kong lok ga «Pjäy shdungoba, bokrotkëba, zrökoba botoya dik jlöe. ⁴⁰ Gueniyo ga pjäy kjrër ber tjeng bor or këlë, or milë, e laga tjarë llëm, e laga bor Datarë. Shto bor or këlë, or milë, e ber ëye kjrara bor Datarë tjeng li kong» le.

⁴¹ Kuya ba oppinggaga doglo sak kjwara (10) lirë ga iirkono Santiago, Juan kong. ⁴² Gueniyo rokara Jesúsde uunkong, ga tjlë ba kong ga «Miydëmi pjlú ga kjok ëre kjing go ga nopga judío llëm wleniyo ichagaga ba nopga ichë parkë ara ba kong. Nopga dbo ara wleniyo ba nopga ichë parkë ara ba kong bakoe. Ëye songe le llëm, iche parkë ara ba kong erä. ⁴³ Gueniyo woydër ga pjäy omshäryë eni llëme. Ëye opyë woydë ber tjlwö ara oblë kjinmo ga opyë

ber shäng oblë kjimtaga dey. ⁴⁴ Ëye opyë woydë ber bäm go ga opyë ber shäng parkaga tjwłëk shäng pjir wleniyo oblë kong dey. ⁴⁵ No to ter kjok dogo dwayo ëre ëmdë ga shrono shäng kjok ëreshko, ëye parkë bor kong wlo llëme. Tja shrono shäng parkë oblë kong wlo. Ga tja optwë, wolon wlo, tja ber nopga ara potjwłëkklo wlo, epga dăr wlo» le.

Domer kjok ïgö llëm wleniyo ko Bartimeo pop-tara Jesúsde

⁴⁶ E irgo ga Jesús öötong shäng Jericó kjokyo, ba oppinggaga tjok. Ga opshino löng eshko dwayo ga nopga to jek ara ba tjok. Domer sök kjłara eshko kjok ïgö llëm wleniyo ko Bartimeo, e Timeo wa. E sök dbur rokë irbo li sor go. ⁴⁷ Kura ga «Jesús, Nazaret so li tekdo shäng» lëba. Eni ga tjłë ba kong dbo go ga «¡Jesús, David tjëyo, tja songe lozong!» le.

⁴⁸ Kuya löng lirë ga tjłë ba kong ga «Pja kjinkozong» le lok ba kong, gueniyo ga kjinkë llëme.

Tjłëno dbo go jek obi, tjłë ga «¡David tjëyo, tja songe lozong!» le.

⁴⁹ Eni ga Jesús kojongö shäng, ga tjłë löng li kong ga «Rokozı tek bor shwoy» le.

Ga nopga li tjłë ba kong ga «Pja kojözong. Pja woydë llëme. Pja roke shäng» le.

⁵⁰ Kuya ga ba shwong kop lëkong kur may pjang ba kjing go li skwakza wles, ga dbura lono beno buk eshko. Ga kojono jekdo, jek öötong shäng Jesús shäng lishko.

⁵¹ Eshko ga Jesús tjłë ba kong ga «¿Llëye woydëp ga shäryër bop kong?»

«Tjłapga no pingga, tja kjok ïk woydë» le ba kong.

⁵² Kuya ga tjlë ba kong ga «Pja to ga bue. Pja mär bor go kuzong ga pja poptonoe» le.

Jekdo eshko ga beno shäng kjok ïgö wëllë, ga to jek shäng Jesús tjok.

11

Jesús öötong opzrëno Jerusalén kjokyo, pjlu wleni

¹ E irgo ga Jesús jek shäng jongya Jerusalén kjokyo ba oppinggaga tjokshko ga öötong löng Betfagé kjokyo, Betania kjokyo, e ber löng Olivos dlupyo poglo go. Eshko ga ba oppinggaga rokara do pjök, ² ga tjlë ba kong ga «Pjã nom kjok buk bi boksho kjweshko. Eshko ga öng so kwomgla kjoyo dre töshko llgwoklë wleniyo wlëmi sök kjro go kjlara wlënggla, kjing go ëye opyoydë llëm wleniyo. Komi, ga tek sömi bor kong. ³ Eshko ga ëbo tjlë bomi kong ga “¿Shãryëmi kjweni ega?” le bomi kong wleni ga “Woyde Tjlapgarë, ga iche tjwe maling iröng obi” lëmi ba kong eni» le.

⁴ Eni ga jek öötong löng eshko, ga öng lara li wlëna sök kjro go, irbo sor go, u bäng jong kjwara zlong. Ga kõya löngshko ga ⁵ ïya nopga tjeng eshko kjlöbörë ga tjlë lok ba kong ga «¿Öng kjwe komi llëno?» le.

⁶ Kuya lok ga dboryara, lara Jesúsde ba kong sorë li eni.

Ga nopga tjeng eshko li tjlë lok ba kong ga «jölö» le.

⁷ Eni ga öng li tek söra shrono löng Jesús kong, ga ba shwong kop lëkong li iara lok öng li kokso kjing go. Eshko ga Jesús opyono sök öng li kjing go, ga jeke.

⁸ Eshko ga nopga jek löng ba tjok ara. Kjone kjone, ba shwong kop lëkong skwara lok, ga kwoptara lok irbo bäng go ba bäm go. Kjone kjone, kjor korga zara, ga kwoptara lok irbo bäng go eni bakoe.* ⁹ Nopga jek löng ba bäm go, nopga jek löng ba irgo, öö le lok ara. Tjlë ga
«Kjwe pjlú jlõe.

Kjwe ichara Tjlapgarë shrono kjok ëreshko.

Kjwe kjimte Sbörë.

¹⁰ Kjwe ber sök bi pjluyo, bi tjlapga tek dënashko so David dik.

Kjwe kjimte Sbörë.

Sbö sök kjok dogo, e pjlú jlõe» le.

¹¹ E irgo ga Jesús jek opzrëno Jerusalén kjokyo roshko, ga öötong shäng Sbö u zlong bäng. Eshko ga u li roïna llaw pogoshko. Gueniyo öötong kjok sëng kuzong ga to jek Betania kjokyo iröng obi, ba oppinggaga doglo sak kjwara kjingsho pjök (12) li tjok.

Tjlökwo lara Jesúsde beno owa kjor kjlara bo uako wleniyo kong

¹² Wëshko kjok shröng ga opshino to lok Betania kjokyo dwayoshko ga Jesús pjli ara. ¹³ Eshko ga ïya pjola dwayo ga kjor jong kjlara korga tjok ko *higuera*. Eni ga jek äär shäng ba zlong, bo tjokde ïya wlo, gueniyo jong bo dret, korga tjok erä, eshko dbaryo ga kjor li bo dbaryo äätë llëm obi kjïshko.

¹⁴ Eni ga tjlé kjor jong li kong ga «Ëye tjwe bop bo uë ame» le, ga tjlökwo lara li kura ba oppinggagarë lok pjire.

* **11:8** Eshko dbaryo ga pjlupga opzrëk jek kjok roshkoshko ga shäryëba ba kong eni.

Llëbo soynegaga löng Sbö u zlong bäng li ichara Jesúsdë toe

¹⁵ E irgo ga Jesús jek opzrëno Jerusalén kjokyo, ga öötong shäng Sbö u zlong bäng ga nopga löng eshko llëbo soynek, llëbo tjwlëk li ichara opshik ey dwayo. Ba dbur bapkwö kjlopswozlong oba kong li poskara beno tjeng töshko. Dunggwo soynega sökklo li poskara beno tjeng töshko bakoe. ¹⁶ Eshko ga ëye llëbo soynekko li sök tek kalëkong dwayo jek Sbö u roshko jer oplong pjlor kalëkong ga ä, slona Jesúsdë kjïshko. ¹⁷ Eni ga oba piya shäng ga tjlä ba kong ga «Sbö tjlökwö tak pjang eni: “Bor u, e kowëba ber syö uyo wlo, tjëyoga uunkong kong.”† “Gueniyo ioromi beno jong lü uyo”»‡ le.

¹⁸ Jesús tjlökwö li kura syöshtaga kägäyoga, no pinggaga kjok ilgwekklo tara Moisésdë go lirë, ga ñna ga nopga löng ba kuga li beno löng yëy le erä. E kjïshko ga Jesús bangkjre lok ara. Eni ga ëng töno ga tjlä lok ëng kong ga «¿Jesús, e zröy sorë ga pjlü?» le lok eni.

¹⁹ Kjok sëng ga Jesús opshino jek Jerusalén kjokyo dwayo, ba oppinggaga tjok.

Shji syöshtë Sbö kong sorë

²⁰ Wëshko kjok shröng ga jek löng kjor äyoshtara Jesúsdë jong li soy obi. Eshko ga ñna ga kjor li bë jong dogro, dano ba sleng dwayo äär jong ba dbo go. ²¹ Eni ga Pedro tjlä Jesús kong ga «¡Tjlapga no pingga, kjor äyoshtorop kjurgue dano beno jong dogro, ñzong!» le.

† 11:17 Isaías 56.7. ‡ 11:17 Jeremías 7.11.

22-23 Kuya ga tjlē ba kong ga «Pjāy mār Sbō go jlōkoyo. Llēbo shārye Sbōrē ga äe lēmi llēme. Eni ga lēr bomi kong jlōkoyo ga pjāy tjlē dlup kēsbang ère kong ga “Dlup, pja opkjōs jer dlung roy” lēmi ga shāryē bomi kong eni. ²⁴ Pjāy llēbo rokē syō goshko ga woyotjlīmi ga “Wlēnor beno bor kong tjān” lēmi jlōkoyo ga wlēmi.

25-26 »Pjāy lōng syōshtēshko ga llēbo owa shāryara oblērē bomi kong, e woyotjlīmi wleni ga iozī ber tjwłō llēme. Shāryēmi eni ga owa pjang bomi go li lōya bomi Data sōk kjok dogo lirē ber dret eni bakoe» le. §

«¿Pja ichaga èrē?» lara Jesús wloyogarē ba kong

²⁷ E irgo ga jek opzrēno Jerusalén kjokyo obi, ga oōtong lōng Sbō u zlong bāng. Eshko ga Jesús jēk shāng wopro ga syōshtaga kāgāyoga, no pinggaga kjok llgwēkkō tara Moisésdē li go, judío tjlapgaga kjok llgwega wleniyo, e tek shrono lōng ba zlong bāng ga ²⁸ tjlē lok ba kong ga «¿Llēye shāryēp shāng li shāryēp ega? ¿Pja ichaga èrē?»

²⁹⁻³⁰ «Pjāy kong llēbo kjakrokēr bakoe. ¿Juan No Waga, e ichaga èrē, no wē? ¿Ichaga Sbōrēre, de norē? Tja dboryoromi ga tja ichaga èrē lēr bomi kong bakoe» le ba kong.

³¹ Kuya lok ga tjlē èng kong ga «Ichaga Sbōrē loroy ba kong wleni ga “¿Tjlōkwo kjroromi llēm ega?” le bi kong. ³² Gueniyo Juan, e Sbō tjlōkwo laga jlōkoyo

§ **11:25-26** Tek dēnashko ga kjibokwo ère jyā shiraba oblē oblē ara. Ga kjone kjone tjlē ga «Shāryēmi eni ga owa pjang bomi go li lōya bomi Data sōk kjok dogo lirē ber dret eni bakoe. Gueniyo llēbo shāryara oblērē bomi kong owa li ioromi beno tjwłō llēm wleni llēm ga owa pjang bomi go li lōya bomi Datarē llēm bakoe.»

le nopga uunkongdë. E kjışhko ga e ichaga norë lëy ga ä bakoe. Loroy eni wleni ga nopga iirkë lok ara bi kong» le. ³³ Eni ga tjlë lok Jesús kong ga «Miydërwa llëme» le.

Kuya ga tjlë ba kong lok ga «E kjışhko ga tja ichaga ërë lër bomi kong llëm bakoe» le.

12

Parkagaga owa

¹ Eshko ga Jesús tjlëno ba kong lok llëbo jyäglo go. Tjlë ga «Domer shäng kjlara kjok sogo. Pjlara ga kjillgwo dwlayo dgara ba kjokshko, kjëryo tyara jong pjribri, klung kjara ber kjillgwo bo lluzlong shtoyo wlo, ga u shäryara jong kjwara ba dwla li doklo bakoe. Pjir ga kjok li poskwona parkagaga kjlëbö kong, potjwlëya i, ga to kjok shto oblë.

² »Öötong kjillgwo bo kjrozlong dbaryo ga ba parkaga ichara kjlara, kjillgwo bo ber ba kong li rokë parkagaga beno löng ba kjok daga li kong.

³ Gueniyo ga ba parkaga ichara tjwe shäng li shakza lok pjä, ga shpokza lok tjä tjä, ga ichara to iröng or go. ⁴ E irgo ga ba parkaga ichara jek eshko kjlara obi. Öötong shäng kjok buk lishko ga shpokza lok tjä tjä ba kăshko, ga läywara lok owa.

⁵ E irgo ga ba parkaga ichara jek kjlara obi. Era zröra lok. E irgo ga ichara jek kjlëbö obi. Kjone kjone shpora lok, kjone kjone zröra lok.

⁶ »E irgo ga beno sök kjlaraso döe. Ba wa li e. E woyde ara wleniyo. E ichayde domer lirë shara. Wotjlîk ga “Miydër ga bor wa ërera bangkjre lok” le.

⁷ »Gueniyo ga öötong shäng eshko ga parkagaga kjok dagaga löng li tjlē lok eng kong ga “Llono ga kjwe ber kjok ère sogo. Zröroy wleni ga kjok ère kjrëy, ber buk bi kong wlo” le. ⁸ Eni ga shara lok, zröra lok, ga doyo dbura kjok li roy dwayo.

⁹ »¿Eni ga llëye shärye kjok sogo lirë ba tjok lok lëmi? E jongya eshko ba zrök dani. Pjir ga parkagaga wlëya oblë, kjok li de lok ba kong wlo. ¹⁰⁻¹¹ Sbö tjlökwo tak pjang eni:

»«Akkwo woydara u shäryagagarë lok llëm li,
e iak beno buk bäm go,
beno tjwlö ara, oblë kjinmo.

Shäryara Tjlapgarë eni,

ga tjawa beno löng yëy lërwa erä.»*

¿E lomirë llëmdo?» le.

¹² Tjlëno llëbo jyäglo go li kuya ba wloyoga löng lirë ga miydara ga ba layde shäng. Shaya lok woydë, bängzaya lok wlo. Gueniyo oba bangkjre lok ara kjishko ga rayara lok toe.

Shji kä potjwlëk pjlu kësbangyo sök Roma kjokyo li kong

¹³ E irgo ga woydara ga llëbo kjakroke Jesús kong, dborye bëy llëm ga doshaya lok, ga rote lok e go wlo. Eni ga fariseoga ichara kjlëbö, Herodes pjloyoga tjok. ¹⁴ Öötong löng Jesús shwoy ga tjlë ba kong ga «Tjlapga no pingga, miydërwa ga pja tjlë beke. No tjlëshko ga tjlökwo kup llëm, tjwlö kjöm pogo, e bop kong ga tjwlö beke. Pja tjlë bek ë pogo kong. Woyde Sbörë ga shji jëk sorë li lëp jlökoyo.

* **12:10-11** Salmo 118.22-23.

¿Eni ga shji kä potjwlëk p̄jlu kësbangyo sök Roma kjokyo li kong ga p̄jlúre?» le.

¹⁵ Kuya ga miyde ga löng wotjlik owa, nopga Sbö tjlökwo söga jlökoyo le, gueniyo wotjlik owa ba p̄jlúshko li dik. E kjishko ga tjlë ba kong lok ga «¿Tja tjlími ega? Dburwa kä potjwlëkklo li tek sözi bor kong kjwara, ín wlo» le, ¹⁶ ga tek söra lok ba kong kjwara. İya ga tjlë ba kong ga «¿Domer jyäglö sök dburwa ëre go jü ë? ¿Ko tak pjang ëre go jü ë?»

«Kjwe p̄jlu kësbangyo sök Roma kjokyo li İ» le lok ba kong.

¹⁷ Kuya ga tjlë ba kong lok ga «Eni ga llëye p̄jlu İli, e twozi ber p̄jlu kong, gueniyo llëye Sbö İli, e twozi ber Sbö kong bakoe» le. Kuya lok ga beno löng yey le erä.

No woshrozlöng dbaryo

¹⁸ Saduceoga wotjlik ga no wolono ga woshre ame le. Eni ga eshko dbaryo ga saduceoga tek shrono löng Jesús shwoy kjlöbö ga tjlë ba kong ga ¹⁹ «Tjlapga no pingga, kjibokwo tara Moisésdë beno pjang li tjlë ga “Ëye wolono, wapga beno ba boy tjok llëm ga shinmo kjlarayo li orkwosmok ba boy beno sök li tjok, wa tjok wleni ga e ber shinmo li İ wleni wlo.”†

²⁰ »Pjlara ga domerga löng doglo kjäk (7) epenga döe. Ba këguëyo orkwosmono, ga wolono, ga wapga beno llëme. ²¹⁻²² Eni kuzong ga ba löng orkwosmono ba syä tjok, gueniyo wolono jek, ga wapga beno llëm bakoe. Ba lëmgä orkwosmono ba syä tjok kjlara kjlara eni bako, ga wolono

† **12:19** Deuteronomio 25.5-6.

uunkong, ga wapga beno ba boy tjok llëme. E irgo ga walë li to wolono bakoe. ²³ ¿Eni ga domerga doglo kjäk (7) li orkwosmono uunkong walë li tjok kuzong ga no woshrozlong dbaryoshko ga walë li ber domerga kjone dey li boy?»

²⁴ «¡Pjãy diktong löng jlõe! Sbö tjlökwo tak pjang li miydëmi llëm, ba dbo kësbang li miydëmi llëm bakoe. ²⁵ No woshrozlong dbaryoshko ga ëye orkwosmok ame. Eshko ga nopga ber löng Sbö parkagaga kjok dogo so wleni shara. ²⁶ Pjãy wotjlik ga no wolono ga woshre ame lëmi. Gueniyo ga dënashko ga kji sho pjë jong ri ri lishko ga llëye lara Sbörë Moisés kong li, e tara Moisésdë beno pjang kjibokwo go. Tjlë ga “Tja Abraham, Isaac, Jacob, e Sbö.”[†] ¿E lomirë llëmdo? ²⁷ E shinmoga Sbö llëme. E nopga löng së li Sbö. Pjãy diktong löng jlõe» le ba kong.

Kjok llgwekklo tjwlö kësbangyo

²⁸ Eshko ga domer shäng kjlara, e no pingga kjok llgwekklo tara Moisésdë li go. Jesús lano saduceoga tjok li kura, ga wotjlik ga Jesús omdboryono beke le. Eni ga tjlë ba kong ga «¿Kjok llgwekklo tjwlö kësbangyo li kjone dey?»

²⁹ «Tjlökwo tak pjang kjwara tjlë ga “Israel tjëyoga, tja tjlökwo kuzia. Tjlapga, e bi Sbö, e kjlaraso. ³⁰ Llëbo woydëpshko, llëbo woyotjlipshko, llëbo shäryëpshko, pja sök së obishko ga Tjlapga, bop Sbö li woydos jlökoyo iyado.”[§] Kjok llgwekklo tjwlö kësbangyo li e. ³¹ Kjok llgwekklo kjrina obi tjwlö ara. Tjlë ga “Pja opwoydë sorë ga bop kjlara,

[†] 12:26 Éxodo 3.6. [§] 12:30 Deuteronomio 6.4-5.

e woydos eni bakoe.”* Kjok llgwekklo tak pjang tjwlõ ara, kkring pjök ëre kjinmo drete» le ba kong.

³² Kuya ga tjlë ba kong ga «Tjlapga no pingga, eni jlõe. Sbõ, e kjlaraso, e pjlor kar go oblëyo dret, lëp shäng sorë li eni. ³³ Ga llëbo woydëyshko, llëbo woyotjliyshko, llëbo shäryëyshko ga woyde ga Sbõ, e woydëy jlökoyo ïyado, e jlõe. Shji opwoydë sorë ga woyde ga bi kjlara, e woydëy eni bako, e jlõ bakoe. Kjok llgwekklo kkring pjök ëre tjwlõ ara, öng llë, dli llë twëy Sbõ kong, suy öng sho sukklo kjing go wlo tjeng kës li kjinmo» le.

³⁴ Kuya ga wotjlik ga domer li tjlë shäng bëye le. Eni ga tjlë ba kong ga «Sbõ ber bop pjluoyo wlo ga kjwe sira obi eröe» le. Eshko dbaryo jek lëkong ga ëye wokjang llëbo kjakrokë ba kong wlo ame.

¿No pjluoyo iche le Sbörë li, e ë?

³⁵ Ga Jesús sök oba ping Sbõ u zlong bäng wopro ga tjlë oba kong ga «Tjlapga no pinggaga kjok llgwekklo tara Moisésdë li go tjlë lok ga “No pjluoyo iche le Sbörë li, e David tjëyo tek ber ba irgo li” le. ¿Le lok eni ega? ³⁶ Pjlara ga David go Sbõ Sëyashko ga no pjluoyo li kowara ba Tjlapgayo. Eshko ga David tjlë ga

»“Tjlapga tjlëno bor Tjlapgayo kong ga
 ‘Pja tek wlar ber sök bor orkwo këlëkong,
 äär jong bop moskwoga zanor pjir guing,
 eshko ga twër ber bop kong ichëp wlo’ ” le.†

³⁷ ¿Eni ga no pjluoyo li kowara Daviddë ba Tjlapgayo kuzong ga e ber ba tjëyo tek ber ba irgo li sorë?»

* **12:31** Levítico 19.18. † **12:36** Salmo 110.1.

le.† Llëye le Jesúsdë shäng li, e kukoba ga beno löng woowa llëme.

No pinggaga kjok llgwekklo tara Moisésdë li go wloná Jesúsdë

³⁸ Ga Jesús sök oba ping obi ga tjlē ba kong ga «iPjây sjëk, no pinggaga kjok llgwekklo tara Moisésdë go li tjok! Jëk löng doyono shwong kur may, tjwlō ara wleniyo go äe. Woyde lok ga bangkjreba llëbo soynezlóng shtoyo. ³⁹ Judíoga syō uyo roshko ga woyde lok ga löng sökklo pjlú goshko. Oba tön, iëshko ga woyde lok eni bakoe. ⁴⁰ Gueniyo syāpga llëbo döya lok ba shjiryo. E irgo ga syōshtë wop ara, “Nopga kjwera pjlúe” lëba wlo le. E kjishko ga epga shdüya Sböré ara anmoyō, oblë kjinmo» le.

Syā kjlara dburwa twono Sbō kong

⁴¹ E irgo ga Jesús sök Sbō u zlong bäng ga dbur bapkwō jong soy ba bokshto kjwara, ga iya sök ga oba tjwe dbur ië jong ba bapkwō li roy. Ga nopga dbur ara wleniyo omië jong bayo arae. ⁴² E irgo ga syā song wleniyo shrono shäng kjlara eshko, ga dburwa iara kjwo pjökdewa. Ba dburwa iara li, e tjwlō chira anmoyō wleniyo. ⁴³⁻⁴⁴ Iya Jesúsdë ga ba oppinggaga rokara tek ba zlong bäng, ga tjlē ba kong ga «Nopga dbur ara wleniyo kjwe omiono ara wleni jlōe. Gueniyo kjwe ba worbo wleniyo iayde. Syā song wleniyo kjwera, ba dburwa tjeng sira li woydara ba llëbowa tjwlëkklo. Eni ëmdë ga twara Sbō kong drete. E kjishko ga lër bomi kong jlökoyo ga syā kjwe, dburwa iara sira tjwlō llëm wleni jlōe.

† **12:37** Eshko dbaryo ga ëye, nopga mite ba dorko kowe tjlapga llëme.

Gueniyo Sbö kong ga tjwlö ara, llamo omiono lok kës wle kjinmo» le.

13

«Sbö u pjir ber drete» lara Jesúsde

¹ E irgo ga Jesús opshino jek Sbö u jong lishko dwayo, ba oppinggaga tjok. Eshko ga kjlara tjlä ba kong ga «Tjlapga no pingga, Sbö u ère akyo lok kës kësese. U lok ère wolëso İzong» le.

² Kuya ga tjlä ba kong ga «¿U lok kës kës ère İp shängde? Llono ga èreshko akkwo ëmdë ber tjeng ëng kjing go kjwara llëme. Llëbo tjeng kës ère pjir ber drete» le.

Kjok pjir dbaryo jyãglo

³ E irgo ga jem öötong löng Olivos dlupyo, Sbö u jong li bokshto, ga Jesús sirkeno sök eshko. Eshko ga Pedro, Santiago, Juan, Andrés, e tek shrono löng ba zlong bäng, tjlä lok ba kong dboshko wlo. Tjlä ga ⁴ «¿Llëye lep shäng li, e shäryë llono? ¿E shäryë dörö li jyãglo wen llë?»

⁵ «Pjäy sjëk, pjäy jyãpgwëba llëm wlo. ⁶ Eshko ga nopga wen tjwe ara, tjlä ga “No pjlyo ichara Sbörë shrono shäng li tja” le. E go ga oba jyãpgwe lok ara.

⁷ »Roy kumi ga oba ëngkjwë kjok shto oblë oblë arashko ga llëye bangkjrämi llëme. E shäryë eni kjluwe. Gueniyo eshko ga kjok pjir dbaryo li äätë llëm obi. ⁸ Tjëyoga oblë oblë ëngkjwë lok ëng tjok. Nopga kjok shto oblë oblë so ëngkjwë lok ëng tjok bakoe. Kjok shto oblë oblë goshko ga yo tjwe ara, pjli tjwe ara bakoe. Gueniyo llëbo wen tjwe owa anmoyö li soye llëbo kës ère go kjwlë jä.

⁹ »Eshko ga pjāy sjēke. Pjāy twēba kjok llgwegaga kong, pjāy shpoya lok no shpokklo go judioga syō uyo roshko wlo. Bor kjīshko ga pjāy iche lok äär löng no ichagaga bokshto, pjłupga kēsks bokshto bakoe. Eshko ga llēbo ĩnōmi, kuromi li roy lēmi ba kong, miyde lok wlo. ¹⁰ Kjok pjitē llēm obishko ga Sbō tjlōkwo roy pjłú äär tjēyo kjrina kjrina kong, kukoba wlo. ¹¹ Ga pjāy shakoba, sōkoba äär löng tjlapgaga kēsks bokshto ga pjāy woydē llēm, “Llēye lēr” lēmi llēme. Eshko ga pjāy tjlēshko ga tjlōkwo twe Sbōrē bomi kong, lēmi wlo. E kjīshko ga pjāy woydē llēme. Eshko ga pjāy li tjlēkdo llēme. Sbō Sēya li tjlēkdo bomi kjīshko.

¹² »Nopga epenga dō ēng twē tjlapgaga kong, zrōya lok wlo. Dataga, e ba wapga twē eni bakoe. Wapga iirkono ba data, ba mekē kong ga twe tjlapgaga kong, zrōya wlo. ¹³ Pjāy ĩywa nopga uunkongdē shjiktēng bor kjīshko. Gueniyo ga ēye mār bor go äär jong ba dbo go ga era dār ber shāng pjłú ĩyado.

¹⁴ »Llēbo lēr bomi kong miydēmi wlo. Llono ga llēbo wen owa anmoyō Sbō shto zrek li roshko. E kjīshko ga shto li ber zrekteng ame, ga ēye äär eshko ame bakoe. Jekdo eshko ga pjāy löng Judea kjokyo ga pjāy tōkzong jem dlup lēkong; ¹⁵ pjāy löng bomi u dbo kjing sdok li kjing go ga pjāy tōkzong jek maling, pjāy opzrēk jek bomi u roshko llēbo kjrē llēme; ¹⁶ pjāy löng bomi kjokshko ga pjāy jek bomi ushko irōng bomi shwong kop lēkong kjrē llēme. ¹⁷ E dbaryo ga walēga löng kjlaraso llēm, e song jlōe. Walēga kjwozirwa tjeng nā iē, e song jlō bakoe. ¹⁸ Rokozi Sbō kong ga pjāy tōk eni kjok owa

dbaryo llëme. ¹⁹ E dbaryo ga llëbo wen nopga kong owa anmoyõ. Llëbo eni, e ïkdaba tek kjok shäryara Sbörë dämärshko dwayo llëm, ga wen e kjoyo ame. ²⁰ Llëbo owa ère ie Sbörë ber dbar ara llëm, ba nopga kjrara li woyde ara kjïshko. Eni llëm kjwe ga èye dâr ber sök së kjlara llëme.

²¹ »Eshko dbaryo ga no tjwe shäng tjlë ga “iNo pjluyo ichara Sbörë li shäng na ïzïa!” le, llëm ga tjlë ga “iShäng kjwe!” le bomi kong, gueniyo jlõ lëmi llëme. ²² Eshko ga nopga ara to löng tjlë ga “No pjluyo ichara Sbörë shrono shäng li, e tja” le. “Tja Sbö tjlökwo laga kjok ère so” le. Gueniyo epga ichaga Sbörë llëme. Llëbo ïydëba llëm wleniyo shärye lok ara. Llëbo jyägïo shärye lok oblë oblë bakoe. Shärye lok eni, oba ara jyäpgwe wlo, Sbö nopga kjrara li ëmdë jyäpgwe wlo le, gueniyo epga jyäpgwe ga äe. ²³ iEshko ga pjäy sjëke! Llëye wen eshko li loror bomi kong pjir tjän.

No to tjer kjok dogo dwayo li tjwe iröng obi dbaryo

²⁴ »Llëbo owa ère dbaryo irgo ga
»“Dlo ber pjang yët,
ga mok kãã të ame.

²⁵ Dbala lon ter kjok dogo dwayo,
ga kjopkwo ber dete erä.”

²⁶ »Eshko ga ïkoba ga no to ter kjok dogo dwayo ère ter tjwe pjäng sho roy, ga bor dbo kãã ïkoba wëïëe. ²⁷ Bor parkagaga kjok dogo so ichër bor nopga kjrara li wlokjrë lok kjok kjwang jïkong, kjok pjir äär kjone ga eshko, kjopkwo pjir äär kjone ga eshko bako, epga töya wlo.

²⁸ »Tja kuzña. Pjãý pin, kjor ko *higuera* li go. KJOR kowo wen mite, korga wen tjaglënsško ga miydëmi e go ga lushko dbaryo äätoe. ²⁹ Eni ga llëbo kës ère shãryë li ìmishko ga miydëmi e go ga no to ter kjok dogo dwayo ère tjwe iröng obi dbaryo li ääto eni bakoe. ³⁰ Lër bomi kong jlökoyo ga nopga löng eerishko dbaryo kjone kjone wolontë llëm obishko ga llëye lër shäng bomi kong ère shãryë uunkong. ³¹ Kjopkwo, kjok ère, e pjir ber drete. Gueniyo bor tjlökwoora ber pjang ÿyado.

³² »E dbaryo llono, kjok orë, èye ommydë llëme. Miydaga Sbö parkagaga kjok dogo sorë llëm, miydaga Sbö Wa èrerë llëm bakoe. Miydaga Data Sbörë eröe. ³³ E kjïshko ga koshëmi löng sjëk ÿyado, e dbaryo wen äär llono miydëmi llëm kjïshko. ³⁴ Tjllökwo lër bomi kong llëbo jyäglo go, shãryëmi eni wlo. Domer shäng kjlara u sogo. To opshik jek kjok shto oblë wlo ga ba parkagaga ie ber löng ba u li dë. Kjlara kjlara kong pak twe ber oblë oblëe. Ga tjlë u bäng daga li kong ga “¡Pja shäng sjëke!” le. ³⁵ Eni ga u sogo tjwe iröng llono miydëmi llëm, kjok ro zar kjwlëre, kjok rongde, kjörkö kjlunshkore, de kjok shräntore. E kjïshko ga pjãý löng sjëk ÿyado. ³⁶ U sogo li tjwe maling wleni ga woyde ga pjãý wlëya löng pë wleni llëme. ³⁷ Llëye lër bomi kong li, e lër nopga uunkong kong, “¡Pjãý löng sjëke!”» le ba kong.

14

«¿Jesús, e shay, zröy wlo sorë ga pjlu?» lara ba wloyogarë

¹ Eshko ga Israel tjëyoga dōktong tek Egipto kjokyo dwayo dbaryo shrëkklo, pjlung shosho suk pjir shäryak ba uukklo tjok llëm dbaryo kjwe dbar pjök obi. Eshkoshko ga syōshtaga kägäyoga, no pinggaga kjok ilgwekklo tara Moisésdë'li go, e tōno lok, ga tjlëno lok ëng kong ga «¿Jesús, e shay, zröy wlo sorë ga pjlú? Shay wlo ga jyōyotkëy. ² Gueniyo dbar shrëzlong dbaryo llëme. Llëm ga oba ara ga wlikëba äe» le.

Walë kjlara, poshtikklo tjwlō ara wleniyo tyara Jesús dlu kjing go

³ Jesús jek oōtong shäng Betania kjokyo, Simón ushko. Dënashko ga Simón'li poglo go swlo ara, sho an do jikong, gueniyo poptonoe. Jesús sök Simón ushkoshko ga walë shrono shäng kjlara, wloshko poshtikklo bapkwō tjwlō ara shäryak akkwō ko *alabastro** go, roshko poshtikklo lō pjlëblië tjwlō ara wleniyo. Eshko ga söra jek Jesús sök ië lishko, ga ba bapkwō'li dlora, ga poshtikklo'li tyara ba dlu kjing go. ⁴ Ìya no kjone kjone tjeng eshko lirë ga iirkë jong, tjlë lok ëng kong ga «¿Kjwe zāya kjweni ega? ⁵ Soynena kjwe ga dburyo shaya bayo domer parkë dbargwo sak dbäw pjlōglo mya (300) āska wleni, oba song wleniyo kjimtoklo wlo dey» le. Ga walë'li wlona lok ara.

⁶ Eni ga Jesús tjlë ba kong ga «¡Wëyë! ¿Walë kjwe läywëmi kjweni egaro? Llëye shäryara bor kong ère beno pjlú. ⁷ Oba song wleniyo löng bomi tjok ìyado, ga kjimtëmi, woydëmi llono ga eshko. Gueniyo tjara ber shäng bomi tjok ìyado

* **14:3** Alabastro, e ak pjlublún wleni, ga poshtikklo bapkwō shäryëba e go.

llëme. ⁸ Llëye shärye bor kong ga pjlú li, e shäryayde bor kong. Poshikklo li tyara bor doyo go, ère bor poshäryayde, tja iëba ber buk sakshko wlo. ⁹ Lër bomi kong jlökoyo ga kjok kjwang jìkong kjone pogo ga Sbö tjlökwo roy pjlú lëbashko ga llëye shäryara walë kjwerë bor kong ère woyoshrëba, ga roy lëba bakoe» le.

«Jesús twër ba wloyoga kong» lara Judasdë

¹⁰ Jesús oppinggaga doglo sak kjwara kjingsho pjök (12) kjlara ko Judas Iscariote. E öör shäng syöshtaga kägäyoga ìk, Jesús soyneya, twe ba kong lok wlo le. ¹¹ Kuya lok ga beno löng wopjlú, ga tjlë lok ba kong jlökoyo ga «Enira pja potjwlënwa» le.

Eshko jek lëkong ga beno shäng wotjlik ga «¿Jesús twër ba kong sorë ga pjlú?» le.

Jesús iono ba oppinggaga tjok

¹² E irgo ga pjlung shosho suk pjir shäryak ba uukklo tjok llëm dbaryo li öötonge. E dbaryo ga öng wlëp ushko so llgwoklë zröya, sho suya, Israel tjëyoga döktong tek Egipto kjokyo dwayo dbaryo shrëkklo. Eshko ga ba oppinggaga tjlë ba kong ga «¿Israel tjëyoga döktong tek Egipto kjokyo dwayo dbaryo shrëkklo li, e dliyo shäryërwa kjone ga pjlú?» le.

¹³ Kuya ga tjlë ba oppinggaga do pjök kong ga «Pjäy nom jek u lok arashko. Eshko ga domer wlëmi shäng kjlara, di bapkwö sök jong kjwara, roshko di. Pjäy jek ba irgo. ¹⁴ Ìmi ga opzrëk jek u roy ga pjäy tjlë u sogo kong ga “Tjlapga no pingga tjlë ga ¿Israel tjëyoga döktong tek Egipto kjokyo dwayo dbaryo shrëkklo li, e dliyo uër bor

oppinggaga tjok li kjeryo kjone? le” lëmi ba kong eni. ¹⁵ Eni ga pjây kong, kjër pîya jong kjomo kjwara kësbang, poshäryak pjire. Llëye uëy wlo li shäryëmi pjir ber tjeng bäm go eshko» le.

¹⁶ Eni ga ba oppinggaga do pjök li to jek öötong löng u lok arashko ga llëye lara Jesúsde ba kong li wlëna tjeng eshko uunkong eni. E irgo ga dbar shrëkklo li dliyo poshäryara lok.

¹⁷ Öötong kjok shkë ga Jesús öötong shäng eshko, ba oppinggaga doglo sak kjwara kjingsho pjök (12) li tjok. ¹⁸ Löng ië wopro ga Jesús tjlë ba kong ga «Lër bomi kong jlökoyo ga pjây löng ië bor tjok kjlara, tja soynega, twe oba kong» le.

¹⁹ Kuya lok ga beno löng woydë arae. Ga kjlara kjlara tjlë Jesús kong ga «¿Tja llëm llëmdo?» le.

²⁰ Kuya ga tjlë ba kong ga «Pjây doglo sak kjwara kjingsho pjök (12) kjlara. Èye sök bor tjok, ba pjlung shosho suk pjir pöya sök bor tjok ioklo kjwaraso roy ga bor soynega li e. ²¹ No to ter kjok dogo dwayo ère wolon, tak pjang Sbö tjlökwo go sorë li eni. Gueniyo bor soynega, era song jlöe. Weno llëm kjwe ga pjlu ba kong dey» le.

²² Löng ië wopro ga pjlung shosho suk pjir kjrara Jesúsde kjwara, ga tjlë Sbö kong ga «Tjawa kong dli tworop ère. Tjawa ber wopjlu bop tjok e kjishko» le. E irgo ga pjlung shosho li tora, twara sira sira ba oppinggaga kong, ga tjlë ba kong lok ga «Kjrozï, ère bor sho wleni» le.

²³ E irgo ga di ioklo kjrara kjwara, roy kjillgwo bo dyo dbo ara, ga tjlë Sbö kong ga «Tjawa kong kjillgwo bo dyo tworop ère. Tjawa ber wopjlu bop tjok e kjishko» le. E irgo ga twara ba oppinggaga

kjlara kjlara kong, ga iara lok sira sira uunkong.
²⁴ Ga Jesús tjlë ba kong lok ga «Ëre bor srëng wleni. E go ga tjlökwo twara Sbörë, beno ïyado wlo li, e shärye. Bor srëng li kwon, nopga ara kong.
²⁵ Gueniyo lër bomi kong jlökoyo ga kjillgwo bo dyo iër ame, äär jong Sbö ber no pjluyo dbaryoshko jä. Eshko ga iër obi» le.

«Pjäy tjeng uunkong ëre, tja rayëmi pjire» lara Jesúsä ba oppinggaga kong

²⁶ E irgo ga tono lok pjlara Sbö kong, ga to jem lok Olivos dlupyö. ²⁷ Öötong löng eshko ga Jesús tjlë ba kong ga «Sbö tjlökwo tak pjang eni:

» «Öng daga li zrör,
 ga öng wlëp ushko so tjeng li shdär ber kjloro erä.»†

Eni ga pjäy tjeng uunkong ëre, tja rayëmi pjire.
²⁸ Gueniyo ga tja wolono, ga tja woshrara Sbörë iröng obishko ga tja äär Galilea kjokyo bomi bäm go. Pjäy koshër shäng eshko» le.

²⁹ Kuya Pedrorë ga tjlë ba kong ga «Llamora, pja rayara uunkong pjir ëmdë ga tjara, pja rayër llëme» le.

³⁰ Kuya ga tjlë ba kong ga «Lër bop kong jlökoyo ga pjesit kjok shränto ga kjörkö kjluntë pjloglo pjök llëm obishko ga “Jesús, e ë miydër llëme” lorop oba kong pjloglo mya tjän» le.

³¹ Gueniyo kuya ga tjlë ba kong obi ga «Eni llëme. Tja zrökoba jek bop tjok ëmdë ga “Jesús, e ë miydër llëme” lër ë kong llëme» le.

Ba oppinggaga llamo li omlono e kjoyo bakoe.

† 14:27 Zacarías 13.7.

Jesús syōshtono Getsemaní kjokyo

³² E irgo ga jek öötong löng Getsemaní kjokyo. Eshko ga Jesús tjlē ba oppinggaga kong ga «Tja to syōshtë Sbō kong wopro ga pjāy wlar ber tjeng na» le.

³³ Eni ga jek syōshtë lishko ga ba oppinggaga tjeng li söra jek ba tjok doglo mya, Pedro, Santiago, Juan. Jek löngshko ga Jesús wosong, woydē ara ba pjlúshko. ³⁴ Ga tjlē ba kong lok ga «Tja woydē ara bor pjlúshko. Kur ga tja wolon kjoyoe. Pjāy ber tjeng na, ga pjāy sjēke» le.

³⁵ Eni ga opkwono jek kēgo sit, ga kjök tono sök, kujono bokdo kjlay klung go, ga rokara Sbō kong ga llēbo wen owa ba kong llēm wlo, ³⁶ tjlē ga «Abba, † Data, llēye shāryēp woydē li shāryēp ga pjlúe. Rokēr bop kong sira ga llēbo wen owa dörö li, e tjwe bor kong llēm kjwe dey. Woydēr eni, gueniyo ga e laga tjarē llēme. E laga ber pjarē» le.

³⁷ E irgo ga tek shrono shäng ba oppinggaga doglo mya beno tjeng lishko ga wlēna bē tjeng pēe. Eni ga tjlē Pedro kong ga «Simón, ¿pja buk pēre? ¿Pja sök sē wop sira ga äre?» le. ³⁸ Ga tjlē mya jikong li kong ga «Pjāy pē llēm, pjāy syōshtos dey. Eni ga pjāy tjlīya Äreshko ga pjāy kjimte Sbörē, llēbo owa shāryēmi llēm wlo. Pjāy llēbo pjlú shāryē woydē jlō, gueniyo pjāy womae» le.

³⁹ E irgo ga jek syōshtë obi. Ga tjlēno jek obi, lara bām go sorē li eni. ⁴⁰ Syōshtono pjir ga tek shrono shäng iröng obi ba oppinggaga beno tjeng lishko, ga wlēna bē tjeng pē obi, bokkwo llir woydē eng go poywōrē kjīshko. Eni ga to dboryara lok llēme.

† 14:36 Arameo tjlökwo abba, e datawa loklo.

⁴¹ E irgo go ga öör pjlara obi. Shrono shäng iröng pjloglo mya go ga tjlë ba oppinggaga kong ga «¿Pjây löng pë, woshtë obire? ¡Kjweni ga bue! No to ter kjok dogo dwayo ëre twëba ber tjeng nopga owa wloshko li dbaryo öötonge. Īzĩa. ⁴² Bor soynega kjwe tek shäng tjän. Pjây kojözong. Shji to ëng dowlëk ba tjok» le.

Jesús shara ba wloyogarë

⁴³ Jesús tjlëydë pjité llëm obishko ga ba oppinggaga doglo sak kjwara kjingsho pjök (12) kjlara ko Judas, e shrono shäng eshko. Nopga shrono löng träk llëm ba tjok, kjone kjone wloshko dröng, kjone kjone wloshko wlëng no shpokklo. Epga ichaga syöshtaga kägäyoga, no pinggaga kjok ilgwekklo tara Moisésdë li go, judío tjlapgaga kjok ilgwega wleniyorë. ⁴⁴ Lunashko ga ilgwera Judasdë nopga li kong pjir tjän, Jesús, e ë miyde lok wlo. Tjlëno ba kong ga «Īmi ga ëye lõ shirš ga domer li e. E shami, ga sömi, dëmi yötso» lara eni.

⁴⁵ Eni ga Judas jek öötong shäng Jesús zlong bäng ga tjlë ba kong ga «¡Miga, Tjlapga no pingga!» le ba kong, ga lõ shira. ⁴⁶ Eni ga shakza lok pjä erä.

⁴⁷ Eshko ga nopga löng Jesús zlong bäng kjlara dröng shino kjwangna, ga syöshtaga kësbangyo li parkaga kwomgwo zakza tas jer lon pjik buk töshko erä.

⁴⁸ Eshko ga Jesús tjlë nopga li kong ga «¿Pjây tjwe bor shak dröng tjok, wlëng no shpokklo tjok kjweni ega? ¿Tja shamishko ga tja ëngkjwë bomi tjok lëmiro? ⁴⁹ Tja öör shäng oba ping ara, Sbö u

§ 14:44 Lõ shik lanyo, e tak pjang Génesis 27.26 go.

zlong bäng, pjäy löng lishko. ¿Tja sharomi eshko llëm egaro? Gueniyo ère shäryë jüni, Sbö tjlökwö tak pjang'li ber jlökoyo wlo» le.

⁵⁰ Eshko ga ba oppinggaga Jesús rayono uunkong, ga töktong to lok ey dwayo. ⁵¹ Eshko ga dwlas jek shäng kjlara ba irgo, taywono kjingoklo pjublún wleniyo go döe. İya nopga jek tjeng Jesús söga lirë ga shakza lok pjä le, ⁵² miga shara lok uriso, beno löng ba shwong'li shayde erä. Eni ga opdöno jek wles, ba shwong'lira beno tjeng nopga li wloshko erä. Ey ga töktong jek shäng kjlop drete.

Jesús söra öötong shäng Judío Kjek Llgwegaga Këskësyö boksho

⁵³⁻⁵⁴ E irgo ga Jesús söra lok to jongya syöshtaga kësbangyo sök lishko. Pedro jek shäng kä kjwaraso kä kjwaraso ba irgo. Öötong'löng eshko ga opzrëno jek u li roshko, ga Pedro beno sök iökkok, u bongk-jako, Sbö u dagaga löng li tjok.

Syöshtaga kägäyoga, judío tjlapgaga kjok llgwegaga wleniyo, no pinggaga kjok llgwekklo tara Moisésdë li go, e töno tjeng uunkong u li roshko tjän. ⁵⁵⁻⁵⁶ Syöshtaga kägäyoga, Judío Kjek Llgwegaga Këskësyö uunkong, Jesús zröya lok woydë. E kjışhko ga nopga rokara ara töno tjeng lishko, Jesús rotë wlo. Eshko ga nopga kojono ara, Jesús rotë wlo, gueniyo ba jyöyotkayde lok eröe. Kjlara kjlara tjlëno oblë oblë erä. E kjışhko ga Jesús rotoklo wlo wlëna lok llëme. ⁵⁷ E irgo ga domerga kojono oblë, ga Jesús jyöyotkara jek obi. Tjlë ga ⁵⁸ «Kjwe kurorwa, tjlë ga “Sbö u ère shäryak norë, e shdör dret, ga äär dbargwo mya ga shäryër kjwara

obi shäryak norë llëme» le eni» le. ⁵⁹ Gueniyo epga tjlëno bek llëm, tjlëno lok oblë oblë erä.

⁶⁰ Eni ga syöshtaga kësbangyo li kojono nopga töno tjeng li boksho, ga tjlë Jesús kong ga «Pja rote löng ara. ¿Dboryëp llëmde?» le. ⁶¹ Kuya ga beno shäng kjinge. Dboryara llëme. Eni ga syöshtaga kësbangyo li tjlë ba kong ga «¿No pjluyo ichara Sbörë shrono shäng li, e pjare? ¿Sbö poshrërwa li, pja ba Ware?» le.

⁶² Kuya ga tjlë ga «Eng, e tja. Sbö, llëye shärye woydë li shärye ga pjlúe. Ga llono ga no to ter kjok dogo dwayo ère ìmi sök ba orkwo këlëkong, tja ìmi ter tjwe kjok dogo pjäng sho tjrëko bakoe» le.

⁶³ Kuya syöshtaga kësbangyo lirë ga ba shwong dwlëkza tjã tjã iirdë. Tjlë ga «¿Rotaga wlëy obi llëno? ⁶⁴ ¿Domer kjwe shäng Sbö läywë owa, ber tjwlö llëm wlo le! E kuromi pjir tjän. ¿Kumi ga sorë?» le.

Kuya nopga töno tjeng uunkong lirë ga tjlë ga «¿Kjwe zrökko!» le.

⁶⁵ Eshko ga kjone kjone, Jesús go tröng twara lok, bokkwo go shwomzrëng kjrochara lok tuke. Eni ga yokza lok pjök pjök, ga tjlë ba kong ga «Pja yoga èrë los borwa kong» le. E irgo ga Sbö u dagaga omsöno, ga shpokza lok pjök pjök erä.

«Jesús, e ë miydër llëme» lara Pedrorë

⁶⁶ E wopro ga Pedro sök kjoko, u bongkjako. Eshko ga kjoglo shäng kjlara, syöshtaga kësbangyo parkaga wleniyo. ⁶⁷ İya ga Pedro sök iökkok. Ga İya yötso robyë wëleshko ga tjlë ba kong ga «¿Nopga jëk löng Jesús, Nazaret so tjok li kjlarayo pja llëmdo?»

⁶⁸ «¿Jyö! E ë miydër llëme. Llëye lep shäng li miydër llëm bakoe» le ba kong. Ga jek öötong shäng

kjër pjlør kalëkong. Eshko ga kjörkö sök kjwara, ga kjluno pjlara.

⁶⁹ Eshko ga ĩya kjoglo lirë jek obi ga tjlë nopga tjeng'li kong ga «Kjwe ëmdë ga ba kjlarayo» le.

⁷⁰ Kuya Pedrorë ga tjlë nopga 'li kong ga «jyõ!» le obi.

E irgo ga nopga tjeng eshko 'li tjlë ba kong ga «¿Pja Galilea so llëmdo? E kjĩshko ga miydërwa pjlu ga pja ba kjlarayo» le.

⁷¹ Kuya ga tjlë ba kong ga «jyõ! Lër bomi kong jlökoyo ga domer lëmi löng'li, e ë miydër llëme. Eni llëm ga rokër Sbö kong ga tja shdüya» le.

⁷² Jekdo eshko ga kjörkö 'li kjluno jek pjlara obi, öötong pjloglo pjök. Eshko ga woyoshre Pedrorë kjlay ga Jesús tjlëno ba kong ga «Kjörkö kjluntë pjloglo pjök llëm obishko ga “Jesús, e ë miydër llëme” lorop oba kong pjloglo mya tjän» lara. Eni ga woroyë ga ä, ga slatonge.

15

Jesús söraba Pilato bokshto

¹ Wëshko kjok shröng ga syöshtaga kägäyoga, judío tjlapgaga kjok llgwegaga wleniyo, no pinggaga kjok llgwekklo tara Moisésdë 'li go, e tönö lok Judío Kjok llgwegaga Këskësyo uunkong tjok, llëye shärye lok Jesús tjok 'li llgweya lok ba tjok wlo. Lanyotkara lok pjir ga Jesús orkwo pjirra, ga söra, twara Pilato kong.

² Öötong löng ba bokshto ga Pilato tjlë Jesús kong ga «¿Judío pjluo 'li pjare?»

«Lëp sök om go liro» le ba kong.

³ Eshko ga Jesús rotara syōshtaga kägäyogarë, llëbo ara kjīshko. ⁴ E kjīshko ga Pilato tjlë Jesús kong ga «Tja kuzong. Pja rote löng ara. ¿Dboryëp llëmde?» le. ⁵ Gueniyo dboryara llëme. E kjīshko ga woyotjlīya Pilatorë beno sök arae.

Jesús ichara Pilatorë, zrökoba wlo

⁶ Äär lu pjlöbi go ga Israel tjëyoga dōktong tek Egipto kjokyo dwayo dbaryo shrëkklöshko ga nopga bängzak tjeng no shdūzlong uyo roshko li, enido ga raye Pilatorë kjlara. Rokëba ba kong ë ga e rayayde. ⁷ Eshko ga domer bängzak shäng no shdūzlong uyo roshko kjlara ko Barrabás. Dënashko ga ba pjlu, e woyde llëme. E kjīshko ga ëng tōno oblë tjok kjlōbö, ga ëngkjwono lok pjlu li nopga tjok, ga nopga zrōra lok. E kjīshko ga bängzak shäng eshko, no zrōga oblë li tjok. ⁸ Eni ga nopga shrono löng ara ga tjlë Pilato kong ga «Rokërwa bop kong sira ga nopga bängzak tjeng no shdūzlong uyo roshko li rayos kjlara borwa kong, shäryëp enido sorë ga eni» le.

⁹ Kuya ga tjlë nopga li kong ga «¿Woydëmi ga judío pjlu yo lëmi li dötë bomi kongde?» le. ¹⁰ Miydara pjlu ga Jesús woydëba ara kjīshko ga ymoyotke syōshtaga kägäyogarë ara, ga söra lok ba kong e kjīshko. ¹¹ Gueniyo ga nopga tjeng eshko li poshduna syōshtaga kägäyogarë arae. Tjlë lok ba kong ga «Rokozī ba kong ga Barrabás, e dōyde bi kong dey» le ba kong. Ga rokara lok eni.

¹² Eni ga Pilato tjlë nopga li kong ga «¿Eni ga llëye woydëmi ga shäryër judío pjlu yo lëmi li kong?» le.

¹³ Kuya lok ga tjlěno dbo go, tjlě ga «¡Zrös pjang kjlös go!»

¹⁴ «¿Llě kjīy? Llěbo owa shāryara li lozī bor kong» le ba kong.

Gueniyo ga nopga öö le, tjlě jek obi ga «¡Zrös pjang kjlös go!» le.

¹⁵ Eni ga woydara Pilatorë ga nopga ber löng wopjlu ba tjok wlo kuzong ga Barrabás, e shira, ga rayarae. E irgo ga Jesúsda twara engkjwagaga kong, shpoya lok no shpokklo go wlo, zröya lok pjang kjlös go wlo bakoe.

¹⁶ Eni ga söra lok öötong shäng Pilato u bongkjako. Shto eshko, e kowëba *pretorio*. Ga engkjwagaga tōno tjeng uunkong eshko. ¹⁷ Eshko ga kong shwong wlěna lok kara pjlupga shwong wleniyo ko dingding shwëshwë, ga pjuna lok ba do go. Ga shkō sho ywara lok kjrina, beno pju dlu ioklo wleni, ga iara lok ba dlu go. ¹⁸ Eni ga tjlě lok dbo go ga «¡Judío pjluyo, pja pjlú, pja tjwlō arae!» le lok ba kong, joywe lok wlo. ¹⁹ Eshko ga shpokza lok ara kjorkung go ba kăshko, go tröng tjwara lok bakoe. E irgo ga kjök tono ba zlong bäng, poshrëya löng wleni, miga ba joywayde lok erä.

²⁰ Joywara lok pjir ga ba shwong pjang ba do go ko dingding shwëshwë li skwara lok, ga ba shwong baīya li pjuna lok jek iröng obi. E irgo ga söra lok to, zröya lok pjang kjlös go wlo.

Jesús zröbaba pjang kjlös go

²¹ Jek löng irbo bäng go ga domer tek shäng kjlara ko Simón, e Cirene so. E wapga domerga do pjök ko Alejandro, Rufo. Simón li tek shäng

kjloy dwayoshko ga ÿya ëngkjwagaga jek l'ong lirë ga ichara lok dbo go Jesús kjlös li sök.

²² Ga Jesús söra lok jem öötong löng kjokyo ko Gólgota. (E «No Kä Dboglo dlupyö» loklo.) ²³ Eshko ga kjillgwo bo dyo dbo ara ropsrära lok dwlo lö pjlëblë* tjok. Ga pina lok Jesús kong ie wlo, gueniyo iara llëme.

²⁴⁻²⁶ Öötong dlo wenzong ga löra lok pjang kjlös go. Ga Jesús lök pjang lishko, kjibokwo iak pjang kjwara, e zröya lok llë kjÿ miydëba wlo. Kjibokwo tak pjang li tjlä ga «Domer ëre, e judío pjluyo.» E irgo ga ëngkjwagaga tjeng li tjöto lok llëbo jyäglo go, Jesús shwong li ber ë kong ÿya lok wlo. †

²⁷⁻²⁸ Jesús löra lokshko ga lügwangga löra lok do pjök lok kjlös go bakoe. Kjlara pjang or këlä, kjlara pjang or milë, kjlösyo dboy dboye. ‡

²⁹ Eshko ga nopga jek löng Jesús lök pjangshko li kä wikza tjä tjä, joywe lok wlo. Ga läywe löng owa bakoe. Tjlä ga «¿Pja Sbö u shdök ber dret, ga äär dbargwo mya ga shäryëp ber ba shtoshko iröng obi lorop ga pja oto? ³⁰ Pja opdös om go, pja ter oplös töshko kjlös kjwe go dwayo» le ba kong eni.

³¹ Syöshtaga kägäyoga, no pinggaga kjok llgwekklo tara Moisésdë li go, e omläywono lok eni bakoe. Tjlä lok ëng kong ga «Oba oblëra döra,

* **15:23** Dwlo lö pjlëblë le li, e twaraba nopga lök lok kjlös go li kong, bang kuga ara llëm wlo. † **15:24-26** Löyde lok pjang kjlös go llëm obishko ga ba shwong skwara lok pjire. ‡ **15:27-28** Tek dënashko ga kjibokwo ëre jyä shiraba oblë oblë ara. Ga kjone kjone tjlä ga «Kjlara pjang or këläkong, kjlara pjang or milëkong, kjlösyo dboy dboye. “Domer kjwe llëbo owa shäryaga” laraba ara.»

gueniyo opdök om go ga äe. ³² No pjluyo ichara Sbörë shrono shäng'li, Israel tjëyo pjluyo'li, e pjang om go. Tjawa mär ba go wlo ga woyde ga oplong om go jer töshko kjlös kjwe go dwayo. Eni ga ïnwa, ga jlöe lërwa bakoe» le. Nopga do pjök lök lok kjlös go Jesús pjlor kar kar ëmdë ga omläywë lok eni bakoe.

Jesús wolono pjang kjlös go

³³ Öötong dlo dluw ga kjok ro zoktong kjok kjwang jikong beno yët erä. Beno eni äär jong dlo pjö lë wleni. ³⁴ Dlo öötong eni ga Jesús tjläno dbo go, tjlä ga «*Eloi, Eloi, ¿lama sabactani?*» le. (E «Bor Sbö, bor Sbö, ¿tja rayorop jüni ega?» loklo.)

³⁵ Kuya nopga tjeng eshko lirë ga tjlä ëng kong ga «Kjwe kuzong. Sbö tjlökwö laga tek dënashko so Elías, e rokayde pjang» le. ³⁶ Eshko ga domer shäng kjlara jek tji tji, ga llëbo llukluk di shak ara wleniyo kjrara kjwara, pöra kjillgwo bo dyo shpoä go, kjrochara kjor dbo go, ga poyona, shuya Jesúsde wlo. E irgo ga tjlä nopga tjeng eshko'li kong ga «Wëyë. Elías tjwe ba long kjlös kjwe go dwayore ïy» le.

³⁷ E irgo ga ay le Jesúsde dbo go, ga wolonoe.

³⁸ Sbö u roshko ga shwong kësbang iak pjang eshko li dwlëtong aas ter kjomo dwayo äär jong töshko, beno kjring pjök.

³⁹ Jesús lök pjang kjlös go li boksho ga ëngkwagaga löng li kägäyo shäng eshko. Jesús wolono sorë li ïya ga tjlä ga «Shinmo lök pjang kjlös go kjwe, e Sbö Wa jlöe» le.

⁴⁰⁻⁴¹ Eshko ga walëga tjeng kjlöbö, kjupäshko ga öötong löng Jerusalén kjokyo Jesús tjok. Eshko ga

llëye shäryëba Jesús kong li ñya tjeng pjola sit. E tjrëko tjeng doglo mya, kjlara ko María Magdala so, kjlara ko Salomé, kjlara ko María. María li, e Santiago mite li mekë, José mekë bakoe. Jesús jëk shäng Galilea kjokyo obishko ga eppa jëktong löng ba tjok, ga kjimtara lok däwe. Walëga oblë omshäryono eni eshko bako, ga to tek ba tjok, shrono löng Jerusalén kjokyo bebi.

Jesús doyo jnena José

⁴² Jesús wolono lishko ga poshäryozlöng dbaryo li ey. Eshko ga woshtozlong dbaryo li dloyo ääto, kjok säng tjän. ⁴³ Eshko ga domer shäng kjlara ko José. E Arimatea so, Judío Kajok Ligwegaga Këskësyo kjlarayo, tjwLö ara wleniyo. Sbö ber no pjluyo dbaryo li koshe sök bakoe. E opyono wokjang, jek öötong shäng Pilato shwoy, ga Jesús doyo rokara ba kong, jneya wlo.

⁴⁴ Kuya Pilatorë ga beno sök wotjlik ga Jesús, e wolono maling jlöre le. Eni ga ëngkwaga kägäyo li rokara tek ba shwoy, ga tjle ba kong ga «¿Jesús wolono tjände?»

⁴⁵ «Ëng, wolono tjän» le ba kong. Eni ga José ichara Pilatorë Jesús doyo pjang li kjrë, jneya buk sakshko wlo.

⁴⁶ Eni ga José shwong tjwLëno kara ko pjlublún, pjlú wleniyo, ga jek öötong shäng shinmo lök pjang kjlös go lishko. Eshko ga doyo li lona ter töshko, popgara shwong li go, ga söra jek öötong sakshko. Eshko ga iara pjlëbgwo kak jong guëmkwota roshko, ga ak kësband dira beno jong ba u bäng bäng go, bängzaya wlo.

⁴⁷ María Magdala so, María José mekë, Jesús doyo li iak buk kjone, e ïya beno löng eshko.

16

Jesús woshrono iröng obi

¹ Woshtozlong dbaryo pjitong, öötong kjok shkë ga walëga doglo mya ko María Magdala so, María Santiago mekë, Salomé, poshtikklo lõ pjlëblë tjwłëna lok Jesús doyo li poshtiya lok wlo le.

² Wëshko kjok shröng sondëshko ga jek lok jongya jong sakshko, Jesús doyo iak buk lishko. ³ Jek löng irboshko ga tjłë lok ëng kong ga «¿Ak jong ba sak bängzakklo li kjaga ërë bi kong dani?» le. ⁴ Öötong löng eshko ga ak kësbang li włëna lok dik beno jong pjlëbgwo li sor go.

⁵ Eni ga opzrëno jek pjlëbgwo li roy, ga ïya or këlëkong ga domer sök kjlara mite jā, shwong ko pjlublún, kur maye. Ga beno löng sëya llëme.

⁶ Eshko ga domer sök eshko li tjłë ba kong lok ga «Llëye bangkjrëmi llëme. Jesús, Nazaret so li zröraba pjang kjłös go, ga wolonoe. Pjã tek löng ëre ba doyo włëga. Gueniyo buk na llëme. ¡E woshrono iröng obi! ¡Iak buk li shtoyo kjwe ïzĩa! ¡Bukde ïzĩa!

⁷ ïnomi ga pjã nom tjłë Pedro, Jesús oppinggaga llamo li kong ga “Jesús jek Galilea kjokyo bomi bãm go. ïmi eshko, lara bomi kong sorë li eni” lëmi ba kong eni» le.

⁸ Eshko ga sëya llëm kjışhko ga walëga töktong to lok ey dwayo, jek zron jonge. Llëye ïna li bangkjrara lok ara kuzong ga llëye lara ë kong llëme.

*Jesús weno María Magdala so kong**

⁹ Jesús woshrono iröng obi li, e dbaryo sondë. E dbaryo kjok shröng ga Jesús weno shäng María Magdala so kong bäm go. Walë, e dënashko ga goshko Ä säya doglo kjäk (7), ga ichara Jesúsdë to drete. ¹⁰⁻¹¹ Jesús weno ba kong irgo ga walë li jek öötong shäng nopga jëktong Jesús tjok löng lishko, ga wlëya ga löng woydë, slar ara. Eshko ga tjlë ba kong ga «Jesús woshrono shäng së obi, ga oppino shäng bor kong!» le. Gueniyo kuya lok ga tjlökwo kjre lok llëme.

Jesús weno ba oppinggaga do pjök kong

¹² E irgo ga Jesús oppinggaga do pjök jek jëk löng irbo bäng goshko ga Jesús weno shäng ba kong eshko. Dämär ga Jesús weno María Magdala so kong sorë ga weno shäng ba kong lok e kjoyo llëm, ïya lok ga oblë shara. ¹³ Jesús weno ba kong irgo ga jek iröng ba pjeyoga llamo löng lishko. Öötong löng eshko ga llëye ïna li lara lok ba kong pjire. Gueniyo kuya lok ga tjlökwo kjre lok llëme.

Jesús weno ba oppinggaga doglo sak kjwara kjingsho kjlara (11) li kong

¹⁴ E irgo ga Jesús oppinggaga doglo sak kjwara kjingsho kjlara (11) li löng iëshko ga Jesús weno shäng ba kong eshko. Ga epga wlona ara. Epga mär ba go jlökoyo llëme. E ïnaba shäng së li roy kura, gueniyo jlö lara lok llëm bakoe. Epga wlona ara e kjishko. ¹⁵ E irgo ga tjlë ba kong lok ga «Pjây jongya kjok kjwang jïkong, ga Sbö tjlökwo roy pjlu lëmi

* **16:8** Tek dënashko ga kjibokwo ëre jyä shiraba oblë oblë ara. Ga Marcos 16.9-20 wen pjang kjibokwo këguë anmoyö li go llëme.

nopga uunkong kong. ¹⁶ Ēye tjlōkwo pjlú li kjrono, ga wono jer di roshko ga döya Sbörë. Gueniyo ěye omkjrono llēm ga e shdungko. ¹⁷ Tjlōkwo pjlú kjraga li kong ga dbo twe Sbörë, ga llēbo jyāglo shārye eni: Ä sēyaga iche oba goshko dwayo bor ko go; tjlē tjlōkwo tjaglën; ¹⁸ dgur shaya or goshko, dwlo bi zrökklo ieszko ga llēye shāryë ba kong llēme; orkwo ie swlopga kjing goshko ga poptë eshko bakoe» le.

Jesús to jem kjok dogo

¹⁹ Tjlapga Jesús tjlēno ba kong pjir ga söra Sbörë to jem kjok dogo, ga öötong sirkeno beno sök ba orkwo këlëkong. ²⁰ E irgo ga Jesús oppinggaga jëktong to kjok shto oblë oblë, Sbö tjlōkwo roy pjlú lë oba kong. Jek löng lishko ga kjimte Tjlapga Jesúsde arae. Ga dbo twara ba kong, llēbo jyāglo shārye lok ara wlo, tjlōkwo le lok li, e jlōe woy-otjlíkoba wlo.

**Sbö Tjłõ^{kwo}
New Testament and Shorter Old Testament in Teribe
(PM:tfr:Teribe)**

copyright © 2008 Wycliffe Bible Translators, Inc.

Language: Teribe

Translation by: Wycliffe Bible Translators, Inc.

Teribe [tfr], Panama

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Teribe

© 2008, 2007, Wycliffe Bible Translators, Inc.
All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

539cf8e3-01bf-5f34-8833-610f18367f8c